



Жомий  
БАҲОРИСТОН

Шарқ адабиётининг мумтоз шоири, буюк сўфий, шайх Абдурраҳмон Жомий Навоий ҳазратларининг дўсти, замондоши, маслакдоши, шу қаторда ўзбек ва тожик ҳалқларининг маънавий устози ҳамдир.

Унинг «Баҳористон» асари замонлар оша яшаб келаётган абадий ибратлар, ҳикматларни ўз ичидаги жамлаб, иймонга, эътиқодга, покликка, адолатга, муҳаббатга чорлаётгани, ҳикоятлари ҳануз мутолаа қилувчига улкан саодатли руҳият бағишлаётгани билан бебаҳодир.

**Форс тилидан ҳалқаро  
Фирдавсий мукофоти лауреати  
Ш. ШОМУҲАМЕДОВ  
таржимаси**

ISBN 978-9943-08-048-5

© Абдураҳмон Жомий «Баҳористон». «Янги аср авлоди», 2007 йил

## МУҚАДДИМАДАН

Бу хушкўнгил вақтимиэда, қимматли ўғил Зиёвуддин Юсуф... араб тили бошлангич қоидаларини ва араб илми қоидаларини тўплаш билан шуғулана бошлади, маълумки, кичик болалар ва тажрибасиз ёшларнинг қулогига нотаниш атамалар ва табиатидан узоқ хотималарни ўрганишдан уларнинг қалби чўчийди, хотирага даҳшат ғубори ўтиради; шундай бўлгач, унинг дилига муруват, хотирига қувват бериш мақсадида гоҳ-гоҳ машҳур шайх ва буюк устод Муслиҳиддин Саъдий Шерозийнинг «Гулистон»идан:

«Гулистон» эмасдир жаннатдин нишон,  
Хашак-тикани ҳам анбаргадир кон.  
Жаннат дарвозаси ундаги боблар,  
Файз тўла қиссалар чин ҳавзи кавсар.  
Пардага ўралган нуқталар пинҳон,  
Буларга рашик этар ҳур ила ғилмон.  
Шеърлари дараҳтдир, баланд ҳосилдор,  
Лутф шабнамидан ариқлари бор. —

каби бир неча сатр ўқилар эди. Шу аснода хотирамга унинг шариф сўзларидан шарафланиб ва латиф шеърларидан илҳомланниб, шу турда яшшу услугуда бир неча варақ ижод қилиб, ҳозирларга достон ва гойибларга армуғон этиш фикри келди. Ва бу маънио анжомини топиб бу сурат охирига етди...

Сайр айла бу «Баҳористон»да,  
Кўринар унда шан гулистонлар.  
Латофатдан ҳар гулистонда,  
Гуллар яшнаб, анқиррайхонлар.

Бу «Баҳористон» саккиз равза — боғдан ташкил топган бўлиб, бу жаннат равзаларининг ҳар бирида ўзгача гуллар жилваси ва ўзгача райҳонлар атри. Бунинг гуллари куз шамолидан ҳазон бўлмайди ва райҳонлари қиши совуғидан сўлмайди.

Бирор илинж тиканагидан холи ва бирор тухфа талаб ҳашагидан пок боғни сайр этувчиларга биргина илтимос: бу боғни сайр этиб, томоша қилар эканлар, бу чамани ўстиргунча жигари қон, дили бийрон бўлган боғбонни дуо билан ёд этиб, мақтов билан шод айласунлар...

Бахтилар ичра ҳар ким,  
Бу боққа етса гар жим.  
Ё терса мевасидан,  
Дам олса соясида,  
Кўргазса ҳақшунослик.  
Карамга этса мослик,  
Этса мени дуолар.

## *Биринчи равва*

### **ДАРВЕШЛАР ҲАҚИДА**

Ҳирот пирларидан Абдуллоҳ Ансорий... Ўз ас-ҳоблагрига васият қилиб: «Ҳар пирдан бир сўз эслаб қолинг, агар бу қўлингиздан келмаса, уларнинг исмини ёд олинг, бундан баҳра топасиз», – дер эди.

Эй, сенинг номингдан ёғилади ишқ,  
Нома-пайғомингдан ёғилади ишқ.  
Кўчангдан ким ўтса бўлади ошиқ,  
Эшигу томингдан ёғилади ишқ.

### **Ҳикоят**

Абу Ҳошим Сўфий дебди:  
— Юракдан кибр разолатин ювишдан кўра, тоғни игна  
учи билан қўпориш осон.

Кибрсиазлик лофин урма, уни кўрмоқдан кўра,  
Қоронғу тун чумолининг изин кўрмак осонроқ.  
Кибр гардин аритмоқдан осон эрур шубҳасиз,  
Игна билан тоғни қазиб, остин-устун қўпормоқ.

## Ҳикоят

Шиблининг бошига девоналиқ тушди, уни жиннихона-  
га элтиб қўйишиди. Сўнг бир неча киши кўргани боришиди.

— Кимсиzlар<sup>3</sup> — деб сўради жинни улардан.

— Биз сенинг дўстларингмиз, — дейишди.

У қўлига тош олиб, ҳамла қилди. Ҳаммалари қочиб  
кетишиди.

— Қайтинг, эй даъвогарлар, — деди у, — дўст дўстдан  
қочмайди ва унинг жафо тошидан сақланишга шошмайди.

Чин дўст ул — дўстлиги ошаверса гар,

Дўстидан ёмонлик кўрганида ҳам.

Бошига минг жафо тоши ёғилса,

Мехр уйи у тошдан бўлур мустаҳкам.

## Ҳикоят

Абулҳасан Қушанжи айтган эди:

— Дунёда бир нарса әвазига ёки бирор нарса ғаразига  
дўстлик қилган кишидан кўра хунукроқ нарса йўқ.

Дўст ҳажридан ошиқ кутар адолат,

Ё васл әшигига турар бир ҳолат.

Дўстликдан ўзга бир мақсади бўлса,

Оlamда борми ҳеч бундай разолат.

## Ҳикоят

Дейдиларки, Абуали Даққоқ умрининг охирида шундай  
бир дардга йўлиқдики, ҳар куни эрта саҳар томга чиқар ва  
офтобга юз ўтириб, шундай сўзлар деяр эди:

— Эй мамлакат саргардони, букун ўэингни нечун сеэмиссан ва не жойларни кеэмиссан? Бу ердан кўрағамгинроқ ер кўрдингми ва ё бу тоифа аҳволини сўрдингми?

То қуёш ботиб кетгунча шундай алфоз сўзлар сўзлаб турар эди.

Сенча олам кезган борми, эй қуёш,  
Йўлдан бирор совға бизга эт йўлдош.  
Букун ишқ йўлида кимни учратдинг,  
Дилида дард-алам, кўзларида ёш.

### Ҳикоят

Шайх Абу Сайд ибни Абул Ҳайрдан:

— Сўфиийлик нимадан иборат? — деб сўраганларида у шундай жавоб бериди:

— Бошингда борини чиқариб ташла, қўлингда борини бериб юбор, сенга нима қилсалар чида.

Сўфиийликни истасанг ўэингдан бўлғил халос,  
Чиқиб кетсун дилингдан бутун ҳаво-ю, ҳавас.  
Кўлингда ҳар не бўлса, бошқалар қўлига бер,  
Юз балоға бардош бер, барчага бир қулоқ ос.

Рўям: «Мардоналик ўз биродарлари камчилигини кечиришда ва кетидан кечирим сўраш лозим бўлмайдиган иш қилишда!» — дер эди.

Икки нарса мардоналик бўлур бил,  
Сенга айтиб берай бир-бир қулоқ сол.  
Бири булким, кечира бил дўстларинг,

Ҳатолари бўлса ҳамки, кўп қўпол.  
Иккинчиси узрли иш қилма ҳеч,  
Мард кишига узр сўраш кўп маҳол.

### Ҳикоят

Юсуф ибн Ҳусайн Розий:

— Ҳамма яхшиликлар бир уйда, унинг қалити тавозу  
ва камтаринликдир, ҳамма ёмонликлар бошқа бир уйда,  
унинг қалити манманликдир, — дер эди.

Яхшиликлар бир хонага жам,  
Камтарликдир унинг қалити.  
Ёмонликлар бошқа хонада  
Уни очар манманлик ити.  
Эҳтиёт бўл, тойиб кетмагил,  
Шундан келар юзинг шувити.

### Ҳикоят

Абу али Рудборий шундай деган эди:

— Энг тор зиндон рақибларнинг бир жойда ўтири-  
шидир.

Ёр васлининг бўйидан йўқ нишон,  
У жой озодага мисли зимиштон.  
Ошиқларга рақиб суҳбати зиндон,  
Зиндондан тордир у, зиндондан ёмон.

## **Ҳикоят**

Баҳоуддин Нақшбандий<sup>1</sup> дан:

— Сизнинг жамоангиз қайга элтади? — деб сўраганла-рида у:

— Ҳеч ким жамоадан бир жойга етолмайди, — деб жавоб берибди.

Чакману ҳассадан сафо келмайди,  
Тасбеҳда кўп риё, танҳо келмайди.  
Жамоанг элтади қайга, дейдилар,  
Жамоадан ҳеч иш бажо келмайди.

---

<sup>1</sup> «Изоҳлар» бўлимига қаралсин.

## *Иккинчи равза*

### **ДОНОЛАР ҲИКМАТИ БОБИДА**

Кўлидан келганча нарсалар ҳақидаги ҳақиқатни билишга интилган ва билганидан фақат кераклигини ишларига раҳнамо қилган ва шунигина нафсиning маликаси деб билган кишини донишманд киши дейдилар.

Ўткинчи нарсадан кўнгил уэа ол,  
Абадлик тадбири билан бирга қол.  
Нимани билолсанг билишга интил,  
Сўнгра билганинг бир-бир ишга сол.

### **Ҳикоят**

Искандар Румий жаҳонгирлик даврида ҳийла билан бир қалъани забт этиб эрди, уни вайрон қилишга фармон берди. Искандарга:

— У ерда ҳаким бор, жуда билимдон, ҳар қандай мушкул унинг олди-да осон, — дедилар. Искандар уни олиб чиқиши буюрди. Кўрдиким, афти хунук, бедаво, кишининг кўнгли айнийдиган бир бало. Таъби хира бўлиб, деди:

— Бу қандай хунук сурату қандай совуқ қомат?

Ҳаким бу сўзларни эшитиб, куйиб ёниб кетди ва қизэшиб қаҳ-қаҳ кулиб, деди:

Таъна қилма хунук юзимга қараб,  
Эй ақлу инсофдан бехабар киши.  
Тан қиндири, аммо жон — қиндаги қилич,  
Ўткирлик, кесмоқлик қиличининг иши.

Яна демиш: «Кимнинг хулқи ҳалқи билан яхши бўлмаса, унинг баданидаги териси ўз зинданидир, чунки ўз вуҷуди оҳ-воҳдир, зиндан унинг олдида оромгоҳдир».

Ҳамиша гусса-ю, ғам ўпар дилни печакдек,  
Ҳар кимки, барча бирлан бадхулқлик этса зоҳир.  
Зинданбегига айтиб, зиндан қилмоқ на ҳожат?  
Ўз териси ўзига зиндан этмасми, охир!

Яна шундай демиш: «Ҳасад қилиш ҳамиша кулфатта солади ва ўз парвардигорига хусумат қўзғатади. Бошқага нимаики берган бўлса, қоши уйрулади ва бошқа молига дили банд бўлади».

Ўзгаларга ҳасад ақлдан эмас,  
Асти кетмагайсан ақлдан йироқ.  
Ҳалқдан таъма, ҳасад — алам асоси,  
Таъма ўз, аламинг бўлмай бесаноқ.

Донишманд яна шундай дебди: «Карамлилар бойликни дўстлари билан бирга ҳисоб этадилар ва ақлсиз ҳасислар душманга қолдириб кетадилар».

Ҳарна кирса ҳимматли мард қўлига,  
Сочар дўстлар оёғига барчасин.

Ўзи ўлгач, душманлари бўлишар,  
Хасис киши териб йиққан нарсасин.

Яна демиш: «Кичикларга ҳазилу истеҳзо ўқин отмоқ — улуғлик обрўсин бекорга сотмоқ ва зиллату хорлик фуборига ботмоқдир».

Эй пастлик либосин кийган одамзод,  
Қўрқаманки, номинг бўлажак олчоқ.  
Кичиклар бирла сен бўлма афсункор,  
Ким улуғлик номинг сўнажак мутлоқ.

Яна демишлар:  
— Кимки қўл остидагиларга мушт билан рўпара бўлмиш, охирида ўзи мушт еганлар тепкисидан ўлмиш.

Бир яхши сўзим бор, қулоқ сол, э дил,  
Қолмиш донолардан мерос ўлароқ.  
Ким тортса адоват қиличин қиндан,  
Адолат тифидан бўлади ҳалок.

Искандарнинг қулоқлари бу ҳикмат жавоҳирларга тўлици билан у оғзини ҳам қулоқларига ўхшатиб жавоҳирга тўлдирувчи сўзлар айтди ва қалъани буэниш ниятидан қайтди.

## Ҳикмат

Фаридунки шафқат заминига насиҳат тухмин экди, фарзанди учун қоғозга қўйидаги сўзларни чекди: «Ҳаёт варақлари киши амалининг саҳифаларидир. Унга энг яхши ишларгина ёзиб қолдирилади».

Замон саҳифалари — инсон умрин дафтари —  
Шундайин сўёни демишиш ўйга толган бир доно:  
Кимки бу пок китобда яхши ишлари билан  
Яхши номин қолдирса, ўшанинг бахти аъло.

Ҳакимлардан бири демишки: «Ҳикматдан қирқ дафтар ёздим, аммо ундан наф кўрмадим. Ундан қирқ калимасин ихтиёр қилдим, аммо на манфаату на фойдасин билмадим. Ундан тўрт сўз танлаб олдим ва қидирган нарсамни топиб кўнгилга солдим:

Аввали шуки, аёлларга ҳам эркаклар каби эътимод қўйма... Иккинчиси шуки, бойликка мағрур бўлма, бойлик қанчалик фаровон бўлмасин, уни замон охири паймол этади.

Бойлиқдан керилмоқ — ақлдан нари,  
Чунки у ўткинчи булут сингари.  
Ўткинчи булутда жавҳар бўлса-да,  
Субутига йўқдир ақлинг бовари.

Учинчиси улким, ўз яширин сирингни ҳеч бир дўстингга ҳам айтма, чунки дўстликка халал етиб, душманликка айлангани ҳаётда кўп учрайди.

Эй ўғил, душманларингдан ёширин бўлса сиринг,  
Яхиси дўстлар аро ҳам сўзлама, қолсин ниҳон.  
Бу фалак каж айланиб душман киши дўст бўлганин,  
Дўст душман бўлганин ҳам кўрганим бор кўп замон.

Тўртингчи улким, фақат фойдаси тегадиган илмни олиш керак, фойдасиз фазилатдан қочмоқ ва фақат зарур нарсага қулоқ очмоқ лозим.

Энг зарур билимни қунт билан ўрган,  
Зарур бўлмаганин ахтариб юрма.  
Зарурини ҳосил қилгандан кейин,  
Унга амал қилмай умр ўтқурма.

## Ҳикоят

Ибн Муқаффа шундай ҳикоя қилади:

— Ҳинд донишмандлари ёзган китоблар юз тияга юк бўлди. Улар подшоси қисқартиришни талаб қилди, улар икки тия юкига келтирдилар; яна қисқартирилсин деди, бари тўрт калимага келтирилди.

Биринчи калима подшоларни адолатта чақирав эди.

Агар подшо иши бўлса адолат,  
Катта-кичик ҳаётинда фароғат.  
Дили вайрон йиглар сина чок,  
Демак, унга зулм қилмиш бир нопок.  
Гар замонда оғатлари балодир,  
Фақат подшо адолати даводир.

Иккинчи калима яхшилик қилиш ва шоҳ фармонлари-  
ни бажариш ҳақида раиятга насиҳат эди.

Шоҳ зулми тухмидин халқ ичра доим қўзғолон,  
Буғдой олмиш қай киши шудгорга сочиб арпа дон.

Учинчи калима саломатликни сақлаш, қорин очмай туриб, таом-  
га қўл урмаслик ва тўйиб кетмай туриб, ундан қўл тортиш ҳақида:

Касал сабабидан сақлан аввало,  
Табибдан тегмагай қўпол сўз-бало.

Ортиб түйиб кетмай ёмакдан тийил,  
Очиқмай таомга қўл урма асло.

Тўртингчи калима бегоналарга қарамаслик ҳақида хотинларга насиҳат әди.

Тан маҳрамидан ўзга бўлса ҳамки ҳусндор,  
Содиқ аёл қарамас бегонага бирор бор.  
Фалак ойи бўлса ҳам ҳуснда у ягона,  
Ҳаёлик аёл доим бегонага бегона.

### Ҳикоят

Тўрт подшодан тўрт ҳикматли сўз қолмиш, гўё тўрт камондан чиққан тўрт ўқ фазога йўл олмиш.

Ҳусрав демиши: «Айтмаган сўздан ҳеч пушаймон бўлмадим, кўп сўзлар борки айтганимдан пушаймон бўлдим ва хафаликдан нақ ўлмадим».

Сўз айтиб пушаймон егандан кўра,  
Унсиз ўлтироқлик юз карра афзал.  
Сирингни айтмаслик пушаймонлик йўқ,  
Айтганлар пушаймон бўлар кўп маҳал.

Қайсар демиши: «Айтилмаган сўз устида қудратим, айтилгандан кўпроқ, яъни айтмаган сўзимни хоҳлаган пайтимда айтишим мумкин, айттан сўзимни эса қайта яшириш имкони йўқ».

Ошкор қилмоқ лозим бўлмаган сўзни,  
Хушёrlарга сўзлама осон.  
Сўзламаганингни сўзлай олурсан,  
Айтпач, қайтармоққа топилмас имкон.

Чин ҳоқони шу маънода демиш: «Кўтингча айтиб паришон бўлмоқ, айтмай пинҳон тутмоқдан қийинроқ бўлади».

Қандай сир бўлмасин кўнглингда пинҳон,  
Тез ва осонликча айлама баён.  
Ошкор этиб сўнгра чекма надомат,  
Пинҳон туттил, майли бўлса аломат.

Ҳинд Малики демиш: «Ҳар сўёзи тилимдан учди ҳукмронлик унга кўчди, айтмаган сўзимга эса ўзим ҳоким, қачон хоҳласам шунда айтгум».

Донолар наздида айтган, айтмаган,  
Сўз маъноси ушбу масалга кўчган:  
Ҳар икки ўқдир — бири садоқда,  
Бири эса энди камондан учган.

## Ҳикоят

Ҳинд подшоси Бағдод халифасига совфа-салом билан тиб ва ҳикматда маҳорат эгаси бўлган бир файласуф табиби юборди. Табиб халифа қархисида тик туриб деди:

— Мен сенга фақат подшоларга хос ва султонларга ярашикли уч совра келтирдим.

— Ҳўш, улар нима? — деди халифа.

— Биринчиси — бўёқ, — деди табиб, — сочни қора қиласи. У билан бўялган соч, ҳаргиз рангини йўқотмайди ва ҳеч оқармайди.

Иккинчиси — бир маъжундирки, уни ютиб қанча овқат ейилса ҳам меъдага оғирлик тушмайди ва мижоз бузилмайди.

Учинчиси — белни бақувват қиласиган, пуштни кўпайтириб, шавқни орттирадиган дори. Уни ичган кишининг

хотинларга әхтироси тақрорланған билан қуввати камай-  
майды. Күз нури занфлашмайды.

Халифа бир лаңза ўйланиб тургач, деди:

— Мен ўзингни донороқ, ақлингни бундан аълороқ  
деб ўйлаган әдим. Сен гапирган бүек, ғурур сармояси ва  
фиску фужур моясидир. Сочнинг қоралиги зулмат ва оқлиги  
нур аломати эмасми. Фақат нодонларгина нурни зулматта  
алмаштирадилар.

Оқ сочни қора рангта бўяш билан бир аҳмоқ  
Кексайгандা ёшликтининг орзусини қилса денг.  
Шикорга давлат қуши чиққан доно билади,  
Оқ қарчигай билан ҳеч қаро қарға бўлмас тенг.

Иккинчи совранг — маъжун ҳақида эса шуни билиб  
қўйки, мен овқатдан лаззат топадиган очофатлардан эмас-  
ман ва овқатни керагидан ортиқ емасман. Овқатни қўп  
ёйишдан кўра нороҳат иш борми, қўп овқат еган одам бир  
жойга тез-тез қатнаб, кўзга хунук нарсаларни кўришга,  
кулоққа қўпол товушларни тинглашга, бурунга ёқмайдиган  
ҳидларни искашга мажбур бўлади. Бундай жойга тез-тез  
боришдан кўра ёқимсиэроқ нарса бўлурму?

Билимдонлар, очлик — касалликдир, емак-ичмак унинг  
давоси деганлар-ку. Дардига даво ўрнига касалликнинг  
зўрайишига кўмаклашган кишидан ҳам нодонроқ одам бор-  
ми?!

Ҳожа сақлар иштаҳасин,  
Софлиққа солиб раҳна.  
Сўнг ёпади у раҳнасин,  
Не топса иссиқ — яхна.

Энди аёллар билан алоқангни орттирувчи доринг-га келсак, аёллар билан алоқа ақлсиазликнинг бир тури. Агар халифа... қандайдир бир қиз олдида тиз чўкиб, унга хирс тўла ёлғон-яшиқ мақтovлар айта бошласа уни ақлли деб бўладими?!

Эй донолик лофин урган, шаҳватдан турса титроқ,  
Бузуқ хотин соч ўрими жиннилигинг занжири.  
Тиз чўкиб, олдида қилсанг бадқилиқлик ошкор,  
Ақлдан йўқдир асар, бу жинниликнинг бир тури.

### Ҳикоят

Кисро мажлисига билимдонлардан уч киши — рум файласуфи, ҳинд ҳакими ва Бузургмеҳр тўпланишган эди. Суҳбат дунёда энг ёмон нарса нима, деган масалага етганда рум олимиде деди:

- Қариллик ва сустлик, йўқчилик ва қашшоқлик.
- Нотоблик ва надомат, — деди ҳинд ҳакими.
- Ажал яқин келиб, бутун ишлардан узоқлашмоқ, — деди Бузургмеҳр.

Унинг бу гапига ҳамма қўшилди.

Кисро саройига донолар келиб,  
«Фалокат нима» деб қурдилар суҳбат.  
«Ғам мавжининг энг зўр тўлқини нима?»

Жавобини излаб, сўрдилар ҳикмат.

- Бетоблик ва андуҳ, — деди биттаси,
- Қариликда йўқлик, очлик, бетоқат.

Учинчиси деди — беаёв ажал,

Дунё ишларидан ажратур соат.

Бунинг сўзи бўлди барчага маъқул.

Йўқ дейишди, бундан оғир фалокат.

## **Ҳикмат**

Бир донишманддан:

- Одам қачон овқатта шошилади, — деб сўраган экан,
- у:
  - Бадавлат оч қолиб, ичи ачишганда, камбағал эса овқатга етишганда, — деб жавоб берибди.

Овқатнинг кўп-камин соғлиғим хароб  
 Қилмасин, деганлар меърида ер.  
 Бой қорни очганда гоҳи-гоҳида  
 Камбағал топганда ё борида ер.

## **Ҳикоят**

Бир донишманд ўз ўғлига деди:

- Эрта тонгда оғзингга бирор луқма овқат тиқмай әшикдан чиқма, чунки тўқлик хушмуомала ва чуқур мулоҳаза мояси, очлик эса енгилтаклик ва ақдисизлик доясидир.

Рўзадин бузмагин табиатингни,  
 Хушмуомалалик одамзод нақши,  
 Тутган рўзанг бўлса бирорвга озор,  
 Рўзани бутунлай тутмаган яхши.

## **Ҳикмат**

Агар оч бўлсанг, қандай ош, нон кўрсанг сенда қаттиқ иштаҳа қўзғатади. Сен билан ўтирган улфатларингда эса иштаҳант сенга нисбатан нафрат уйғотади.

Қуюқ, суюқ ҳар на топсанг уйингда,  
Тўйиб еб олганинг яхшидир бе шак.  
Ўзгалар таомин ҳавас айлама,  
Пастлар атосидан қоқиб кет этак.

### Ҳикмат

Агар мезбон дастурхон атрофида ўзини ҳамма  
неъматлардан баланд тутса, унинг нонидан ўз жига-  
ринг аъло ва унинг шарбатидан ўз қонинг бажо.

Мезбон деяверса «ноним» ва «ошим»,  
Ундаи дастурхонга узатма қўлинг.  
Қовурмасидан ўз кашничинг яхши,  
Ундейлар уйига тушмасин йўлинг...

### Ҳикмат

Кимнинг қўлида қўйидаги беш нарса жилова бўлса,  
яхши ҳаётининг гарови бўлур: биринчиси — тан сиҳатлик,  
иккинчиси — омонлик, учинчиси — риэкининг мўллиги,  
тўртингчиси — содиқ дўст ва бешинчиси фарофат. Кимки  
шу беш нарсадан маҳрум этилган — хуш ҳаёт эшиги унинг  
олдида бекилган.

Хуш ҳаёт омили бешга етади,  
Барча доно шунга қилур ишорат.  
Соғлиғу омонлик, ҳам фаровонлик,  
Яхши сұхбатдош дўст, дилга фарофат.

## Ҳикмат

Завол топадиган ҳар нарсанн ақлли киши неъмат ҳисобига қўшмайди ва унга кўнгил беришга шошмайди. Гарчи умр узун бўлса-да, охири ўлим бўлгач, бу узуунликдан не фойда... Абадий қоладиган неъматни қадроласа бўлади, замон оғатидан омон қолади.

Донолар наздида шуни неъмат бил,  
Жон ундан абадий ололса сурур.  
Олтин, кумуш эса, сен гўрга киргач,  
Оддий тош мисоли ҳар ерда қолур.

## Ҳикмат

Бузургмехордан: «Қандай подшо покизароқ?» деб сўрадилар. «Ундан покизалар омонлик, нопоклар ёмонлик кўрсалар, шул подшо покиза», деб жавоб берди у.

Шоҳ улким, хотири кўп равшану доно әрур,  
Яхшига яхши, ёмонларга ёмон, бадҳо әрур.

## Ҳикоят

Искандар бир билимдон кишини шарафли ва баланд амалидан бекор қилиб, паст бир ишга тайинлadi. Бир куни у Искандар ҳуэурига келганда:

- Қалай, янги амалинг ёқдими? — деб сўради шоҳ.
- Подшонинг умрлари узоқ бўлсин, — деди ул киши,
- одам амали билан шарафли эмас, амал инсон билан шарафга эга бўлади. Ҳар бир ишда ҳам хуштибиятлик, адолат ва инсоф лозим.

Бу гап Искандарга маъқул тушди ва уни ўз лавозими-  
га қайтарди.

Баланд мансаб тепасида ҳам,  
Илм оширмоқ фикрин қыл ҳар дам.  
Мансаб билан баландмас одам,  
Мансаб одам билан муҳтарам.

### Ҳикмат

Уч тоифадан уч хил иш ёмон келади: подшолардан —  
тезлик, донишмандлардан — молга ҳирс, бадавлатдан —  
бахиллик.

Уч ишни қоралар ҳаким қалами:  
Тезлик қылса қудратли подшо,  
Ҳасис бўлса бадавлат киши,  
Молу мулкка ҳирс қўйса доно.

### Ҳикмат

Ҳакимлар айтадилағи, адлдан жаҳон ободон, ситам-  
дан эса вайрон. Адл чироғидан минг фарсанг жойлар рўшино-  
лик олар, ситам эса, минг фарсанг ерга қора соя солар.

Агар чиқса адолатнинг қуёши,  
Таралгай ҳар томон нури зиёси.  
Агар зулм этса золим, бу ситамдан  
Жаҳон бўлғай қора, йўқ интиҳоси.

## **Ҳикоят**

Олий ҳиммат бир дарвеш, шавкатли бир подшоҳ билан тез-тез кўришиб турар, ёқимли суҳбатлар қуарар эди.

Кунлардан бирида у подшо пешонасида маломат изларини сезди, унинг сабабини ўйлаб, хаёли кеэди, аммо ўзининг тез-тез келишидан бўлак сабаб кўрмади. Дарҳол подшо ҳуэурига қатнамай қўйди ва у билан суҳбатдан ўзини тийди. Бир куни подшо йўл устида дарвешни учратиб қолди ва шундай сўроқни орага солди: «Эй дарвеш, не сабабдирким, мен билан алоқангни буздинг, бориш-келишдан қадамингни уздинг?» Дарвеш жавоб берди: «Сабаби шуки, мен келишимдан чеҳрангда малол кўргандан кўра, «нега келмайсан?» деган савол эшитиш яхшироқ эканини тушундим».

Дарвешдан ҳукмдор сўради: «Нечун  
келмадинг олдимга бунчалик узоқ?»  
Ул деди: «Нимага келдинг, дегандан,  
«Нимага келмадинг», деган яхшироқ!»

## *Учинчи равза*

### **ШОҲЛИК ВА АДОЛАТ БОБИДА**

Подшолар донолиги ҳаққонийлик ва адолатдир. Ташқи йилтироқлик жалолат эмас.

#### **Ҳикоят**

Тарих кўрсатадики, жаҳон салтанати беш минг йил давомида кофир муғлар қўлида бўлди ва давлат шулар хонадони қўлида турди. Чунки, улар адл кўргуздилар ва зулмни раво билмайдилар...

Ўлкани сақлашда энг кераклиги —  
Ақлу инсоф эрур, куфру дин эмас.  
Дунё тартибини сақлагучи шоҳ  
Динсиз бўлса ҳамки, одил бўлса бас!

#### **Ҳикмат**

Подшоларнинг яқин кишилари чуқур мулоҳазали ҳакимлар бўлиши керак, ҳазилкаш надимлар эмас. Чунки улардан камол чўққисига кўтариладилар, булардан эса, пастлик жарига итариладилар.

Донолар лабидан тўкилур гавҳар,  
Ким кўксин хазина қилолса аъло.  
Ҳикмат ғазнаси дир донолар дили,  
Ундан узоқ тутма ўзингни асло.

### Ҳикоят

Бир куни эрта билан муъбадлар бошлиғи Қубод шоҳ билан бирга отда йўлга чиқиши. Муъбад оти думини кўтариб орқа оёқларини то туёқларигача булраб юборди. От устидаги суворий уятдан хўп қизарди.

Шу аснода Қубод ундан:

- Шоҳни кузатиб бориш қоидалари қандай, — деб сўраб қолди.
- Улардан бири, — деди Муъбад, — эрталаб подшоҳ билан ҳамсуворий бўлиб борадиган киши отига кўк ўт бермаслиги ва ўзини уятга қўймаслиги керак.
- Мана шу фаросатинг ва зарофатинг туфайли шу даражага етибсан.

Яхшилик йўлидан тойиб кетади —  
Нодон табиати билан иш тутиб.  
Ҳаттоқи ҳайвонни тарбия этар —  
Дено ўз ақлинни раҳнамо этиб.

### Ҳикмат

Султонларга яқин кишилар баланд тоққа чиққан кишиларга ўжшайдилар. Охири султон газаби зилзиласи ёки замон силсиласи уларни тоғ жинсидай ирғитиб ташлайди. Ҳеч шубҳа йўқки, баланддан йиқилган қаттиқроқ йиқилади, пастдан тушган юмшоқроқ.

Баланддир шоҳ ила дўстлик айвони,  
Кўп баландланишдан ҳазар қил, ҳазар.  
Кўрқаман бир куни йиқилганингда,  
Йиқилмагил тағин ҳаммадан баттар.

### Ҳикмат

Аристоталис демиши:

— Атрофида ўлаксалар ўраб ётган қуэгунга ўхшаган подшо энг яхши подшодир. Қуэгунлар ўраб турган ўлаксага ўхшагани әмас, яъни ўз атрофидагилар ҳолидан хабардор бўлмоғи керак, аксинча, атрофдагилар унинг ҳолидан хабардор бўлмасин.

Подшо қуэгун каби бўлсин хабардор доимо,  
Ҳар томонин қуршаб олган мурдалар аҳволидан.  
Бўлмасин мурда мисоли бекабар, ўз атрофин —  
Қуршаб олган, тез чўкувчи қарға қуэгун ҳолидан.

### Ҳикоят

Нўшин Равон Наврўз ёки Мехржон кунларидан бирида меҳмонлар чақирибди. Ўтирган қариндошларидан бири олтин қадаҳни қўйнита беркиттанини кўриб қолибди. Подшоҳ ҳеч нарсани кўрмагандек, индамай қўя қолибди. Баэм охирига етгач, соқий: «Ҳеч ким чиқмасин, олтин қадаҳ йўқолди, мен ҳаммани тингиб кўраман», дебди.

— Кўй, — дебди унга Нўшин Равон, — олган бермайди, кўрган айтмайди.

Бир неча кундан кейин ўша киши Нўшин Равон ҳузурига келибди, қараса устида янги либос, оёғида янги этик. Нўшин Равон унинг кийимларига ишора қилиб: «Бу ўшанданми?» деб сўрабди. Қариндош тўнининг этагини кўтариб, этигини кўрсатиб: «Бу ҳам ўшандан», дебди.

Подшо кулиб юборибди ва унинг қылғулиги йўқлик ва зарурат натижасида эканлигини уқиб, минг мисқол олтин бериш ҳақида фармон чиқарибди.

Инкор қилма, карамидан бўлма маҳрум,  
Карамли шоҳ гуноҳингдан бўлса огоҳ.  
Инкор этиш гуноҳдан ҳам оғирроқдир,  
Ҳар қанчалик бўлса ҳамки оғир гуноҳ!

### Ҳикоят

Ҳажжож ов вақтида лашкарларидан йироқлаб адашиб кетибди. Бир тепаликка чиқиб қараса, бир бадавий араб жулдур кийимини ёйиб, жонворларини териб ўтирган, атрофида туялари ўтлаб юришган әкан. Туялар Ҳажжожни кўриб ҳуркиб кетибди. Араб бошини кўтариб жаҳл билан:

— Бу биёбонга кўз қамаштирувчи кийимда келган кимсанинг бошига Оллоҳнинг лаънати ёғилсин, — дебди.

Ҳажжож ҳеч нима демай, унинг олдига келиб:

— Ассалому алайкум, эй арабий, — дебди.

— Сенга салом ҳам әмас, худонинг раҳмати ҳам әмас, баракоти ҳам, — деб жавоб берив бадавий.

Ҳажжож ундан сув сўрабди.

— Пастта туш, хорлик ва мўминлик билан ичгин, Оллоҳ ҳаққи, мен сенинг ўртогинг ё навкаринг әмасман.

Ҳажжож отдан тушиб сув ичибди ва:

— Эй арабий, энг яхши одам ким? — дебди.

— Сендан йироқ. Пайғамбар алайҳисса лом.

— Али ибн Абу Толиб ҳақида нима дейсан? — яна сўрабди Ҳажжож.

— Унинг олижаноблиги ва буюклиги таърифи оғизга сифмайди.

Сўнг яна сўрабди:

— Абдул-Малик бинни Марван ҳақида нима дейсан? Араб ҳеч нима демабди.

— Эй араб, менга жавоб бер, — дебди Ҳажжож.

— Ёмон одам, — дебди.

— Нега?

— У хатога йўл қўйди ва шу туфайли дунё мағрибдан машриққача зулмга тўлди.

— Қанақа хато? — деб сўрабди Ҳажжож.

— Ул фосиқ ва мурдор Ҳажжожкни мусулмонларга амир этиб тайинлади.

Ҳажжож ҳеч нима демабди.

Шу пайт бир қуш қандайдир товуш чиқариб учиб ўтиби.

Бадавий араб Ҳажжожга юз ўтириб дебди:

— Сенинг ўзинг кимсан?

— Нега бу саволни бердинг? — дебди Ҳажжож жавоб ўрнига.

— Учиб ўтган қуш менга бир хабар берди. Бу ерга бир қўшин яқинлашиб келмоқда ва унинг амири сен экансан.

— Унинг сўзи тамом бўлмасданоқ аскарлар этиб келишибди ва унга салом беришибди. Буни кўриб арабнинг ранги ўчиб кетибди.

Ҳажжож буни ҳам бирга олиб кетишга амр қилибди.

Эртасига эрталаб ҳамма нонушта учун дастурхон атрофига йиғилганда Ҳажжож арабни чақиртирибди.

— Ассалому алайкум, эй амир, — дебди бадавий, кириб келаркан.

— Мен сенга ўхшаган жавоб бермайман, ваалайкум ассалом, — дебди Ҳажжож ва ундан сўрабди:

— Овқат ейсанми?

— Таомлар сенини, — дебди бадавий, — агар рухсат берсанг, ейман.

— Ижозат, — дебди Ҳажжож.

Бадавий дастурхонга ўтириб овқатта кўл чўзар экан, деди:

— Бисмилло, иншоолло, таомдан кейин келадиган ишларнинг барчаси хайрли бўлрай.

Ҳажжож кулиб юборибди ва:

— Кеча менинг бошимдан нима ўтганини билдингми?

— дебди.

— Оллоҳ ёринг бўлсин, кеча сен билан менинг орамизда бўлиб ўтган сирни очма.

— Эй араб, қўйидаги икки ишдан бирини иктиёр қил, ё менинг ёнимда қол, мен сени яқин кишиларим қаторига қўшай, ёки Абдул-Малик ибни Мараван ҳузурига юборай ва унинг ҳақидаги сўзларингни хабар қиласай. Нима истаса, шуни қилсин.

— Яна бир йўли бор, — дебди бадавий.

— Қанақа йўл?

— Мени қўйиб юбор, соғсаломат ўз манзилинга стиб олай, сен ҳам мени кўрма, мен ҳам сени ҳеч кўрмай.

Ҳажжож кулиб юборибди ва бадавийга минг дирҳам пул бериб юртига жўнатишга амр этибди.

Мард киши сўз лутфи хитоб ҳусни-ла,  
Эзолимни қайтариб туролса яхши.  
Карамни унугтан сахийни эса,  
Саховат йўлига буролса яхши.

## Ҳикоят

Ҳурмуз ибни Шопурнинг вазири унга мактуб йўллаб: «Денгиз савдогарлари оламжаҳон марварид келтирмишлар, мен уни юз минг динорга подшо учун олдим. Аммо эшитишимга қараганда, шоҳ буни истамас эмиш. Агар шундай бўлса, унда марваридларни фалон савдогарга яна юз минг динор фойдасига сотиш мумкинми», деб ёзган экан:

Ҳурмуз шундай жавоб битибди:

«Юз минг устига юз минг динорнинг бизнинг назаримизда нима қадри бор? Агар биз савдогарлик қилсак, подшоликни ким қилади ва савдогарлар нима билан машғул бўлади?»

Подшолар шаънига бундай ишлар келишмас,  
Молу давлат йиграй деб, бўлиб олса савдогар.  
Нима иш қилишади унда савдогар аҳли,  
Шоҳ жаҳонда савдони ўзига қилса ҳунар.

## Ҳикоят

Мўминлар амири Умар халифалик вақтида Мадинаи Мунавварада бир деворни шувар эди. Бир яхудий келиб: «Басра ҳокими мендан юз минг динорлик мато олди, аммо ҳақини бермаяпти» деб шикоят қилди.

— Қофозинг борми? — деди унга амир.

— Йўқ, — деди яхудий.

Ердан бир сопол парчасини олиб унга: «Сендан шикоят қилувчилар ҳисобсиз, аммо мамнун бўлгандар топилмайди. Ё шикоятдан оппоқ бўл, ё ҳокимиятдан йироқ», деб ёэди ва охирига: «Ёзувчи Умар ибни Ҳаттоб», деб

қўшиб қўйди. Унга муҳр ҳам босмади, имэо ҳам чекмади, аммо унда шундайadolat савлати ва сиёсат салобати бор эрдиким, яхудий уни Басра ҳокимиға берганда, у отдан тушиб ер ўпди ва от устида ўтирган яхудийга қарзини батамом тўлади.

Подшода бўлмаса агар сиёсат,  
Густоҳлар қўлида бўлур хору зор.  
Тиш-тирноқ қолмаган кекса шерни кўр,  
Чўлоқ тулки унга беради озор.

### Ҳикоят

Ҳошимийлар авлодидан бўлган бир бола обрўли бир арбобга беадаблик қилди, боланинг амакисига шикоят етди. Амакиси унинг адабини бериб қўймоқни мақсад этди.

— Эй амаки, — деди бола. — Мен қиласар ишимни қилиб қўйибман, ақлим йўқ экан, энди сен нима қилсанг қил, аммо унутмаки, сенинг ақлинг бор.

Бирор аҳмоқона иш қиласа сенга,  
Олижаноблик қил, озорин унут.  
Нафс-ҳаво, жаҳолат келмасин ғолиб,  
Ақлинг фармонига мувофиқ иш тут.

### Ҳикоят

Ҳажжожга қарши исёнчилардан бир хотинни тутиб унинг олдига келтирдилар.

Ҳажжож унга гапирганда, бошини қуий солиб, ердан қўзини узмас, сўзларига жавоб ҳам изламас, атрофига боқмас ва пинагини бузмас эди.

У ерда ҳозир бўлганлардан бири хотинга қараб:

— Амир сенга гапирса, нега ундан юзингни ўтирасан?

— деди.

— Мен Аллоҳ таолодан уяламан, — деди хотин, — Аллоҳ назар қилмаган кишига мен қайси кўз билан қарай?

Боқмагил золимнинг юзига эинҳор,  
Дўзах дарвозасин у худди ўзи.

### Ҳикоят

Искандардан:

— Сен шундай ёшлик ва навқиронлик чоғингда қандай қилиб бу давлату салтанат ва кенг мамлакатга эриша олдинг, — деб сўраганларида, у шундай жавоб берибди:

— Мен душманларимга хушмуомалада бўлдим, токи адоват жилови йирилсин, дўстларга садоқатда бўлдим, токи дўстлик равнақ қилсан.

Сен, Искандар, давлатини орзу қилсанг, ёқ чироқ,  
Ёвларингни, ёр қилғил, дўстларингни яқинроқ.

### Ҳикоят

Бир куни Искандар ўз лашкарбошлари билан ўти-  
пар эди.

— Субҳоноллоҳ, худо сенга катта салтанат берди, — деди улардан бири, — хотинларнинг сонини қўпайтири, токи фарзандларинг бисёр ва дунёда номинг пойдор бўлсин.

Искандар унга жавоб бериб деди:

— Кишининг номи дунёда фарзанд билан әмас, унинг хуш ҳулқи ва яхши ишлари билан қолади. Дунёда мардларни енгиб, хотинлардан енгилган киши мард әмас.

Отага номаълумдир ўғил қандай бўлгуси,  
Ақласизлар хайлидан ё ақдли бир доно.  
Ўз қилмишинг — фарзандинг, камолга йўлла шуни,  
Фарзанд кутиб хотинлар қули бўлмагил асло.

## *Тўртинчи равва*

### **САХОВАТ ВА КАРАМ БОБИДА**

#### **Насиҳат**

Саховат бирор нарсага қараб ёки эвазига бирор нарса талаб бўлса, ҳатто талаб этилган нарса мақтов ва миннадорчилик бўлгани тақдирда ҳам, у саховат эмас.

Сахий дема саховатига,  
 Бирор талаб қўйса гар одам.  
 Сахийликмас, бу савдогарлик,  
 Бунда йўқдир шараф ва карам.  
 Саховатдан кимнинг мақсади —  
 Агар бўлса шуҳрат, овоза.  
 Аҳли карам шаҳрида унга  
 Ҳар доимо бекдир дарвоза.

#### **Ҳикоят**

Бир бадавий араб мусулмонлар амири ҳазрати Али қаршиисига келиб, индамай ўтираверди. Қашшоқлик ва хорлик, гадолик ва зорлик аломатлари чеҳрасидан намоён эрди.  
 — Менга нима ҳожатинг тушди, — деб сўради ундан ҳазрати амир.

Бадавий тилга олишга уялган сўзини ерга чизиб: «Қашшоқман», деб ёзиб қўйди.

Ҳазрат амир унга икки бўлак мато берди. Унинг бундан бошқа ҳеч нимаси йўқ эрди.

Бадавий ўрнидан туриб бир бўлак матога танасини ўради, иккинчисини бошига салла қилиб олди ва бу ҳолатига мувофиқ фасоҳат ва балоғатда баркамол бир неча байтни филбадиҳа ўқиди. Шеърлар ҳазрати амирга ниҳоятда маъқул тушди. Мўминлар амири Ҳасан ва мўминлар амири Ҳусан... шаҳзодалар ҳақи бўлгани уч динор пул ҳаэррати амир ёнида әди, шуларни ҳам бадавийга инъом қилиб юборди.

Бадавий пулни олиб:

— Эй, мўминлар амири, мени уруғингдаги энг бадавлат киши қилиб қўйдинг, — деди ва чиқиб кетди.

Карамли амир деди:

— Мен ҳазрати пайғамбардан эшиктан әдимки, «Ҳар бир кишининг қадр-қиммати унинг феълу камоли ва сўзлари жамоли билан ўлчанади».

Одамнинг қиймати эмас сийму зар,  
Одамнинг қиймати — билим ҳам ҳунар.  
Назар сол, дунёда ҳунар туфайли  
Ҳожасидан қадри ортиқ қўп қуллар.  
Қанчалаб ҳожалар ҳунарсиз учун —  
Қуллари олдида беўқ, бесипар.

## Ҳикоят

Жаъфар ўғли Абдулло сафарда юриб, бир хурмозорга тушиб дам олар әди. Хурмозор посбони бир қора ғулом әди. Ғулом кундалик ёмаги учун уч дона нон олиб келган

эди. Қандайдир бир ит пайдо бўлиб, гулом ўз нонидан бирини унга ташлабди, ит апил-тапил ютиб бўлган эди, иккинчисини ҳам ташлади, буни ҳам еди, учинчисини ташлаган эди, уни ҳам ҳаммасини еб тугатди.

Шунда Абдулло гуломга қараб:

— Сенинг кундалик емишинг нима? — деб сўради.

— Ҳозир кўрганинг, — деди қул.

— Нечун итни ўзингдан ортиқ сийладинг?

— Шунинг учунки, у узоқ йўлдан келган, мусофири, гумонимча, жуда оч, уни оч қолдиргим келмади.

— Энди ўзинг нима ейсан?

— Бугун рўза тутаман, — деди гулом.

«Ҳамма мени сахий дейди, аммо бу гулом мендан ҳам сахийроқ экан», деб ўйлади Абдулло. Сўнгра хурмозорни ичидаги бор жиҳози ва посбон қули билан сотиб олди-да, қулга озодлик ёрлиғи битдириб, хурмозор боғни унга ҳадя этди.

Оч итга ўз луқма нонини бериб,

Ўзининг нафсини тиёлган инсон.

Қул бўлатуриб ҳам қўп озодларни

Ўзига қул қилиб олмоғи осон.

## Ҳикоят

Мадинада бир олим бор эди. У ҳар ишга омил ва ҳар билимда комил эди. Бир куни канизаклар бозорига йўли тушди, бир чолғувчи канизакка кўзи тушди. Унинг савти камоли, ноёб ҳусни жамоли офтоб эди.

Олим канизак жамолининг жинниси ва камолининг девонаси бўлиб қолди ва унинг чолғу ҳавасидан борлиқ юкини йўқлик саҳроси сари сурди ва куйи навосидан ру-

ҳини ақл танлигидан чиқариб, бехудлик кенглигига топшириди.

Яхши овоз бўлса, ё гўзал чеҳра,  
Ҳар бирига фидо бўлур жону дил.  
Агар иккаласи бирга йиғласа,  
Соҳибдил ҳолати бўлади мушкул.

Олим донолик либосини ечиб ташлаб, танасига расвоник кийимини илибди ва Мадинанинг кўча ва бозорларида бепарволик ошкор қилибди. Дўстлари унга танбек қилсалар ҳеч фойдаси бўлмабди. Унинг тили фақат бир нарсадан сўёлар, унинг дили фақат шу нарса деб бўйлар эди:

Жилвалари шундай этса дилни банд,  
Ошиқ ундан нечук қутулар ҳарчанд.  
Кишилар танбеки қулоққа шамол,  
Шамолдан аланга авж олур баланд.

Шу ҳолни Абдулло Жаъфарга ҳикоя қилишди. У канизак хожасини чақириди-да, қирқ минг дирҳамга канизакни сотиб олди ва ўша олимни девона қилган куйни чалишни буюрди. Сўнг:

- Буни кимдан ўргандинг? — деб сўради.
- Фалон чолғувчидан, — деди канизак.

Уни олиб келишга фармон этди ва ул олимни чақириб деди:

- Сени девона қилган куйни канизак устодидан тинглашни истармидинг?
- Ҳа.

Ул чолгувчига ўшал куйни ижро этишни буюрди. Олим ҳушсиэ йиқилди. Ҳаммалари уни ўлди деб гумон қилишди. Абдулла Жаъфар бўлса:

— Мен бу кишининг ўлимига гуноҳкор бўлдим, — дер эди. Унинг юзига гулоб сочишни буюрди ва ўзига келгач:

— Ул канизак ишқида бу даражага етганингдан бехабар эканмиз, — деди.

— Ё, Оллоҳ, — деб оҳ урди олим, — яширин сирларим ошкор бўлдими?!

— Бу куйни ўша канизакнинг ўзидан әшитишни истайсанми?

— Кўрдинг-ку, буни бошқадан әшитиб, шу ҳолга тушдим, — жавоб берди олим, — агар уни маъшуқам лабидан әшиитсам ҳолим не кечур?!

— Уни кўрсанг танийсанми? — деб сўраган эди, у йиғлаб бу байтни ўқиди:

Дединг, дилу жонингни олганни танийсанми?  
Оlamda undan ўзга ҳеч кимни танирманми?

Канизакни олиб чиқиб, унга топширишга фармон этди ва деди:

— Бу сеники, мен унга кўз қирини ҳам ташлаганим ийқ. Олим бўлса, Абдулло оёғига йиқилди ва деди:

Карам қилдинг, юзимга сув югурди,  
Висол келди, фироҳ-қайғу югурди.  
Ғамим қувиб қарор, сабрим кетурдинг,  
Шўр ёш тиниб, кўзга уйқу югурди.

## Ҳикоят

Бир куни кечаси Мисрнинг Жомеъ мачитига ўт тушиб ёниб кетибди. Мусулмонлар бу ишни насронийлардан кўриб, уларнинг уйларига ўт қўя бошлишибди. Миср сultonи ўт қўювчилардан бир қанчасини тутиб олибди-да, бир жойга йифиб, улар нечта бўлса, шунча чек тайёрлашга буюрибди. Чекларда ўлим жазоси, қўлни чопиб ташлаш ёки қамчилаш жазолари ёзилган бўлиб, кимнинг чекига нима тушса, шул жазони олар экан, ўлим жазоси чиқибди.

— Мен ўлимдан қўрқмайман, — дебди ҳалиги одам, — аммо онам бор, унинг мендан бошқа ҳеч кими йўқ.

Бу одамнинг ёнида бошқа бир киши турган экан, унинг чекида «қамчилаш» жазоси ёзилган экан, у:

— Менда она йўқ, — дебди-да, ўз чекини қўшнисига бериб, ўзи унинг чекини олибди, унинг ўрнига буни қатл қилишибди, аввалги киши эса қамчи жазоси билан тирик қолибди.

Кўплар молин бериб, мардлик қиласи,  
Мардлар жонин бериб, мардлик қиласи.  
Билдиким, дўстнинг эҳтиёжи жон,  
Аямай, ўз жонин айлади қурбон.

## Ҳикоят

Ҳотамдан:

— Ўзингдан сахийроқ кишини ҳеч кўрганмисан? — деб сўрашибди.

— Ҳа! — дебди у. — Бир куни бир етимчанинг уйига кириб қолдим. Унинг ўн беш қўйи бор эди. Дарҳол бир қўйни сўйиб, пишириб, менинг олдимга олиб келди. Қўй

гўштининг бир жойи менга ёқиб қолди-ю, мен: «Худо ҳаққи, жуда лаэзатли экан», дедим.

У йигит ташқарига чиқиб, қўйларини бирин-кетин сўйиб, менга маъқул тушган жойини пишириб менинг олдимга қўяверибди. Менинг бу ишдан хабарим бўлмабди. Ташқарига чиқиб отта минай деб турганда, ҳовлида жуда кўп қон тўкилганлигини кўриб, сабабини сўрадим.

— У ҳамма қўйларини сўйди, — дейишди.  
— Нега бундай қилдинг? — деб койий бошладим.  
— Худога шукурки, менинг бир нарсам сенга ёқиб қолибди, агар ҳасислик қилганимда, араб шаънига ёмон иш бўлар эди.  
— Бунинг эвазига сен нима бердинг, — деб сўрашибди.  
— Уч юзта саман туя ва беш юз бош қўй, — дебди Ҳотам.

— Бундай бўлса сен ундан олийҳимматлироқ әкансанда, — дейишган экан. Ҳотам шундай жавоб берибди:  
— Ҳайҳот!.. У бор-йўгининг ҳаммасини берган эди, мен әсам бор нарсамдан бир қисминигина бердим, холос.

Агарда уйидан чиқариб берса,  
Бор-йўқ яримта ионини гадо.  
Ярим хазинасин берган подшодан,  
Сахийлик бобида шу гадо аъло!

## Ҳикоят

Бир бадавий бир саховатли араб амирининг келиши муносабати билан қасида ёзиб, амирға ўқиб берибди ва қасидани шундай байт билан тугатибди:

Кафтидан тұхфа ёғилган құлларинг чўз мен тараф,  
Устига бўса ёғилган құлларинг чўз мен тараф.

Амир унга қўлини чўзибди. У ўпибди. Шунда амир ҳазил қилиб:

— Мўйловинг қўлларимни тирнади, — деган экан, бадавий ҳозиржавоблик билан:

— Шундай шери ғаррон панжасига мендек ожиз тип-ратикан игнасидан нима зиён, — дебди. Амیرга бу гап жуда ёқиб тушибди ва:

— Бу гапинг ўқиган шеърингдан кўра менга маъқулроқ тушди, — дебди-да, қасидага минг дирҳам, жавобга эса уч минг дирҳам мукофот бердирибди...

Агарда мақтабон қўкка кўтарсанг,  
Ҳамон сўз қадрини билмайди нодон.  
Мадҳ-мақтовга кўп этмай эътибор,  
Баланд-пастин синааб кўргай сухандон.

## *Бешинчи равза*

### **ДҮСТАЛИК ВА МУҲАББАТ БОБИДА**

#### **Ҳикоят**

Икки донишманд орасида ишқ-муҳаббат ҳақида сўз кетди.  
Биро деди:

— Ишқнинг хосияти ҳамиша меҳнату балодир ва ҳамма вақт ошиқнинг тортгани ҳасрату жафодир.

— Жим бўл! — деди унга иккинчи донишманд. — Сен ҳеч қачон жангдан кейинги сулҳни кўрмагансан, фироқ кетидан висол кайфини сурмагансан, соғ дил ошиқлардан латифроқ киши оламда топилмас ва агар бу андишадан узоқ бўлса, ундан ифлосроқ киши бўлмас.

Ишқ нурининг жилваси — мардлар дилин жамоли,  
Дили гўзал бўлмаган, майл қилмас муҳаббат.  
Бунга агар нодонлар ҳужжат талаб этсалар:  
«Жинс жинсига тортади» деган сўз исбот — ҳужжат.

#### **Ҳикоят**

Абу Бақр Сиддиқ халифалик даврида Мадина қўчаларини айланиб юрар, эшиклар ёнидан ўтиб борар эди. Бир эшик ёнидан ўтар экан, йифи овозини эшилди.

Унда бир аёл байт ўқур ва кўзларидан қайноқ ёш тўкур эди.

Эй чеҳраси тўлин ойдан гўзалим,  
Хуснидан кўкдаги қуёш ўсалим.  
Лабимга тегмасдан пок она сути,  
Сенинг номинг эди тилда ғазалим.

Бу байтлар Абу Бакр дилига қаттиқ таъсир қилди.  
Эшикни тақиллатди.

Ҳовли соҳибаси әшик очди.

— Озодмисан ё чўримисан? — деб сўради Абу Бакр ундан.

— Чўриман, — деди у.

— Бу байтларни кимнинг ишқида ўқидинг, кўз ёшлигини кимнинг муҳаббатида тўкасан?

— О, пайғамбар халифи, унинг жаннати ҳаққи, мени кечир.

— Мен токи дилинг сирини билмасмен, бу ердан жилмасмен, — деди халифа.

Канизак дардли дилидан бир совуқ оҳ чекиб, қалбларга ўт солди ва Ҳошим ўғиларидан бирининг номини тилга олди.

Халифа мачитта келиб канизакнинг эгасини топтирди, канизак баҳосини бериб сотиб олди ва севгилиси томон йўлга солди.

Эй дил, ишқ дарди ҳеч қолмайди пинҳон,  
Фақат дардсиз киши сезмас ҳеч қачон.  
Дарддан ўзга даъво йўқ муҳаббатта,  
Йигла ҳар ўткинчи дилин этиб қон.

## **Ҳикоят**

Ҳусну жамоли машҳур ва лутфу навоси манзур гўзал чеҳрали бир канизак бор эди. У бир куни әгаси наздида шийлонда соз чалиб, ғазал ўқир эди. Дилида унинг ҳавоси, бошида унинг савдоси бўлган бир йигит пастда туриб, унинг овозига қулоқ осган, бор вужудини канизак ғазалининг лаззати босган эди.

Ҳар кимки дилдор ҳажрида дил пора қўзда нам эрур,  
Етса қулоққа севганин овози ул хуррам эрур.

Канизакнинг әгаси қўйқисдан пастта қараб, йигитни кўриб қолди ва уни ёнига чақириб олди. Йигитни дастурхонга ўтқазиб сийлади, қизиқ ҳикоялардан сўз очди ва маъно жавоҳирин сочди.

Йигит хотираси ҳамма нарсадан фориғ, кўзи канизакда, қулоги әгасида эди. Канизак ғамза билан нимаини савол айламасин, бу қош ҳаракати ила жавоб берар эди. Ул нимагаки гажаклари ила тугун ташлар, бу ноңзик табассуми ила еча бошлар эди.

Не хушдир икки ошиқ гар топишса,  
Рақибирайи бирла дил ёпишса.  
Кучофу бўсага излаб баҳона,  
Қош-у кўз бирла айтишса фасона.

Суҳбат чўзилиб кеттан эди. Канизакнинг әгаси барчага маълум сабаб билан ташқарига чиқиб кетди. Иккиси бир-бирига муштоқ ошиқу маъшуқ холи қолди, эҳтирос ўти аланга олди. Шунда канизак йигитга қараб оғиз очди ва шундай дурлар сочди:

Худо ҳаққи ошкору ниҳон,  
Барча эрур худо бандаси.  
Неча кўрдим пари-ю, инсон  
Фақат сенсан дил арзандаси.

Йигит ҳам бу сўэни эшишиб, фарёд билан деди:

Сенинг манзилингдир бу кўзу бу дил,  
Бор гўзаллик сенинг ҳуснингдан ҳосил.  
Дилим сенга мойил бўлса не ажаб,  
Тош бўлмаган ҳар дил сенгадир мойил.

Яна канизак деди:

- Жаҳонда биргина орзум бор, сен билан ҳамоғуш бўлсак ва лаблардан шакар нўш этсак.
- Менинг ҳам орзум шу, — деди йигит, — аммо на чора, сенинг хожанг бор.

## Ҳикоят

Обрўли араб қабилаларидан бирида Салил номли йигит одобда ягонаи замон, маракаларда марди майдон, тўқай шерига тик боққан, мардлар майдонида ноғора қоққан эди. Унинг дилида амакиси қизига ишқ ҳавоси, бошида ҳижрон савдоси.

То ўз маъшуқаси жамолини кўргунча қанча меҳнат чекмади, қанча дард кўчатини дилга экмади.

Ҳали севгилиси жамолига тўймай, висол шарбати косасини қўлидан қўймай туриб, ўз турар жойини ўзгартириш, бу ердан кўчиб ўзга ерда макон қуриш зарурати

туғилиб қолди. Ой юэли ёрини кажавага миндириди, бошқа ишларини ҳам тиндириди, йўлга равона бўлди.

Бир кун йўл юриб, бир шинам жойга етиб келди ва шунда манзил қурмоқчи бўлди. Туясини чўқтириб, кажавадан ёрини туширган ҳам эдикки, узоқдан ўттиз отлиқнинг қораси кўринди. Сакраб туриб қуролларини олди ва тўда томон от солди. Яқинлашганда танидиким, душманлар гуруҳи экан. Уларга шердек ташланиб, жанг қилди, кўплари ҳолини танг қилди, аммо ўзи ҳам кўп жойидан яраланди. Шу ҳолатда у севгилиси ёнига келиб деди:

Ёв дастидан ўлим етишди, эй ёр,  
Кел, ҳасрат-ла боқай юзингта бир бор.  
Қонинг тўкай то ёв тўkkунча қоним,  
Ақиқ лабингга ёв тегмасин, зинҳор.

Қиз ҳам шундай деди:

— Худо ҳаққи, агар сен менинг қонимни тўқмасанг, мен ўзим тўқмоқ ва сенинг қонингта қориштиromoқ истагим бор эди. Аммо бу ишни сенинг ўзинг бажо келтирганинг ва юрагингдан бу гумонни нари сурганинг афзал. Салил ўрнидан тик туриб бу қўшиқни бошлади.

Золим бу фалакнинг ишларига боқ,  
Нечук қалбу танам айламиш тупроқ?  
Қафтимда асраган ҳаётим гулин,  
Энди ўз қўлимда этурман мажоқ.

Сўнгра уни қучган маржондан ҳам, ҳатто кўйлаги ёқасидан ҳам рашқ қилиб юрган нозик бўйнига қилич солиб, оламни ёритиб турган шамни ўчириди, ўзининг туп-

роққа беланган юзларини унинг қизил қонига бўяди ва яна душманларга отилиб ҳалок бўлди.

Салил қабиласидагилар бу мудҳиш хабарни эши-тиб, ёқа йиртиб, соч юлиб етиб келишди, ҳар икки жасадни қабила қабристонига олиб боришли, бир ла-ҳадга солишиди, яъни тупроққа топширишиди.

Маҳшар куни уйғонса, бўлмасин деб хору зор,  
Иzzат билан тупроққа топширишиди икковин.  
Бир ёстиққа бош қўйиб ётишар ер остида,  
Иккови бир ухласин, унда бирга уйғонсин.

### Ҳикоят

Аштар номли одобли ва ақлли бир йигит қабила бош-лиқларидан бирининг Жайда номли гўзал қизини севиб қолган эди. Улар бир-бирлари билан учрашиб турад ва ораларидаги муҳаббат мустаҳкамлана борар эди. Сирлари-ни яқин-йироқ қариндош уруғдан яшириб юришар, бутун кучларини сир очилмаслигига сарфлар эдилар. Аммо де-мишларким:

Ишқ сирини таъриф этиб бўлмас бил,  
Юз пардага ўраб беркитмоқ мушкул.

Охир уларнинг сири кундузdek равшан ва қалбдаги ниҳон бутун жаҳон назарига нишон бўлди. Икки қабила орасида адоват қўзғалди. Одам ўлиб, қон тўкилди. Жайданинг қабиласи ўз жойидан ўтовларини кўчириб, бўшқа юртларга кетишига мажбур бўлди. Фироқ кунлари чўзилган сари иштиёқ оловини алангалатирди.

Бир куни Аштар ўз дўйстларидан бирига:

— Мен билан бошқа ерларга бориб, Жайдани кўришимга ёрдам эта оласанми? — деди. — Энди ортиқ чидолмайман, уни қўрмак орзусида жоним ҳалқумимга келди, ёруғ кунларим тунга айланиб кетди.

— Бош устига, — деди дўсти, — ҳар нима десанг бажаришга, ҳар қайга десанг югуришга ҳозирман, мени содиқ қулинг деб бил.

Улар туриб таяларини ҳозирладилар ва бир кечакундуз ва яна бир кун йўл юрдилар. Кечқурун ўшал диёрга етиб келишди. Бир тепага чиқиб таяларига дам беришиди ва ўтов тикишди.

— Тур, — деди Аштар дўстига, — энди бориб, гўё йўқолган таянгни сўрай-сўрай Жайдада қабиласига етиш, ҳеч кимга ҳеч нима дема. Уни топсанг мендан салом еткур ва бизнинг қайга тушганимиздан хабардор қил.

Аштарнинг дўсти шундай ҳикоя қилади:

— Мен туриб кетдим ва исталган қабилага етдим. Менга дуч келган биринчи одам ўшал канизак эди.

Аштарнинг саломини етказдим ва Йайдада аҳволини суринширодим.

— Эрга беришиди, — деди у, — унинг аҳволи танг, эри ҳеч ерга чиқармайди. Аммо сизни учраштираман, сизлар тўхтаган тепанинг орқасида бир дарахтзор бор, хуфтон вақтида ўша ерда ҳозир бўлинглар.

Мен тезлик билан қайтиб келдим ва бу хабарни Аштарга етказдим. Иккаламиз туриб, секин таяларни топиб, айтилган вақтда дарахтзорга етиб келдик.

Йўлга кўэз тутиб, чекиб оҳувой,  
Кутиб ўтирадик, қайда хушчирой?  
Бирдан қўнғироқнинг келди овози,  
Яъни тур, деди у, чиқди тўлин ой.

Аштар ўрнидан иргиб туриб, истиқболига чиқди ва салом бериб, қўлини ўпди. Мен улардан юзимни ўтирдим ва бошқа томонга югурдим. Мени чақириб, кетингта қайт, орамизда ҳеч ношоён ишимиз ҳам, суҳбатдан бошқа юмушимиз ҳам йўқ, дейишди. Мен қайтиб келдим. Улар ўтиришиб, ўтган ва бўлажак ишлардан гаплаша кетди.

Бир оздан кейин Аштар:

— Бу кеча мен билан қолиб, кўэларим интизорлигин қондирсанг, фароғатинг тирноғи билан юзларим тирнаб, меҳринг ўтида қалбимни ёндуурсанг, — деди.

— Худо ҳаққи, мен бу талабингни бажо келтиролмайман, — деди Жайда, — менга бундан кўра қийинроқ ишжаҳонда топилмайди. Яна айём менинг бошимга қаҳрини сочиб, қонли воқеалар юз беришини, балолар дарвозаси менга яна очилишини истайсанми?

— Худога минг қасамким, сени қўйиб юборолмайман ва этагингдан қўлимни олмайман.

Ким келса келаверсин,  
Не бўлса бўлаверсин!

— Бу дўстинг мен нима десам, шуни қилишга ҳозирми? — деди шунда Жайда.

Мен ўрнимдан турдим ва:

— Нима десанг, шуни қилишга ҳозирман. Ҳатто бу йўлда жоним кетса ҳам амрингга мунтазирман, дедим.

У кийимларини ечиб менга узатаркан, деди:

— Кийимларингни ечиб менга бер, ўзинг бу либосларни кийиб, менинг чодиримга бор, парда орқасига ўтиб ўтир, эрим бир коса сут олиб келади ва сенга «бу сенинг шомлигинг, ол», дейди, сен уни олишга шошилма. Бир оз индамай туриб кейин ол, уни ё сенинг қўлингта бериб

кетади, ё ерга қўйиб кетади-да, кейин азонгача қайтиб келмайди.

Нимаики деган бўлса, худди шундай қилдим. Бир маҳал бир коса сут олиб келди, мен узундан-узоқ ноз қилдим, у ерга қўйиб кетмоқчи эди, мен унинг қўлидан олмоқчи бўлдим ва косага қўлим тегиб, сут тўкилиб кетди.

— Бу ҳали менга қўл ҳам кўтарадими? — деди ва қўлинни чўэиб, кийик терисидан ўрилган, дастасига инжу қадалган уни ваҳший ҳайвон панжасидек тутун бир қамчи олди.

Йўғонликда заҳарли илон,  
Узунлиги узун аждардан.  
Илон расми чизиш унга иш,  
Лавҳасидир яп-яланғоч тан.

Сўнг менинг орқамни дўмбира қорнидек яп-яланғоч қилди-да, жанг қунидаги дўмбирачидек бир меъёрда зарба билан ура бошлади, овозимдан таниб қолмасин деб бақиришга ҳам журъат қилолмадим, орқамнинг териси ёрилиб кетаёттанини ҳис этиб, сабру тоқат этолмасдим. Сапчиб туриб ханжар билан кекирдагини тилиб, қонини тўқмоқчи ҳам бўлдим, аммо шундай ғавро қўзғалдики, уни босиш ҳеч кимсанинг қўлидан келмайди, деб ўйладим.

Жайданинг онаси ва синглиси хабар топиб, этиб келишгунча тоқат қилдим. Улар келиб, мени ажратиб, уни чодирдан олиб чиқиб кетишиди.

Бир соат ўтар-ўтмас, Жайданинг онаси кириб келди. Мени Жайда деб ўйларди... Мен йиғлашга тушдим ва нола кўтардим, кийимимга бошимни ўраб, унга орқамни ўтириб олдим.

— Қизим, худодан ҳайик, — деди у, — эрингта ёқмаган ишни қилма. Эрингнинг бир мўйи минг Аштардан ортиқ-роқ-ку, ахир. Аштаринг ким ўзи, сен уни деб шунча заҳмат чекасан ва бу шарбатларни ичасан.

Сўнг ўридан туриб:

— Синглингни юбораман, бул кеча сенга ҳамдам ва сирингта маҳрам бўлади, — деди-да, чиқиб кетди.

Бир соатдан кейин Жайданинг синглиси келиб йиглай бошлади. Мени урганни қарғади. Унга ҳеч нима демадим, менинг ёнимга ётиб, ухлаб қолди, тинчиганидан кейин қўлимни узатиб, оғзини қаттиқ бекитдим ва:

— Сенинг опанг Аштар билан бирга, мен унинг ўрнига бу азобларни тортдим, буни пинҳон тут, бўлмаса сизлар ҳам расво бўласизлар, мен ҳам, — дедим.

Аввал жуда қўрқиб кетди, сўнгра қўрқув хайриҳоҳлик билан алмашинди. Аэонгача ул қиссани қайтариб кулиб ётди.

Тонг ёришганда Жайдада кириб келди, биэни қўриб қўрқиб кетди ва:

— Вой, бу ким, ёнингиздаги? — деди.

— Бу синглинг, синглинг яхши сингил экан.

— Бу қандай қилиб бу ерга келиб қолди?

— Ўзидан сўра, — дедим мен, — ҳозир фурсат танг.

Ўз кийимини кийиб Аштар ёнига жўнадим. Туяларга миниб, катта йўлга тушдик. Йўлда бутун бўлган воқеани унга ҳикоя қилиб бердим. Сўнг менинг орқамни очиб қамчи яраларини қўрди ва кўпдан-кўп узрхонлик қилиб деди:

— Донишманлар, қийинчиллик куни дўст керак, роҳат кунларида улар кўп деб бекорга айтмаган эканлар.

Дил агар ногоҳон ғамга учраса,  
Ғамхўр дўстинг бўлса у ҳам эмасдир.

Кулфат куни содиқ дўстларинг керак,  
Бахтли кунда дўстлар ҳеч кам эмасдир.

## Ҳикоят

Минглаб доно ишқида шайдо, туну кун остонаси ғавғо бўлган гўзалнинг чиройи навбати ўтиб сўлғунилик соати етиб қолди. Эшик ва томдан, девор тошдан хунуклик кириб кела бошлади. Ошиқлари унинг билан алоқани бузиб, унинг остонасидан қадамларини узиб кетдилар. Улардан бирига мен: «Бу ўша сенга ёр бўлганинг ўзи-ку, ўша қош, ўша кўз ўз жойида, ўша лаб ва ўша оғиз бор, қомат эса аввалгидан баландроқ, бадан эса аввалгидан кучлироқ, бу нима бевафолик ва шармандалики, у билан алоқа этагини йиғдинг ва бориш келишни йиғиширидинг?», дедим.

— Ҳайҳот? — деди у. — Нима деяпсан, менинг кўнглимни олган, эс-хушимни ўғирлаган бу қолипдаги руҳи эди. Аъзосининг таносиблиги ва баданинг нозиклиги, овозининг юмшоқлиги ҳаммаси ўшандан эди. Энди руҳ бу қолипдан кўчди, мен қандай қилиб бу жонсиз танага муҳаббат қўяй, сўлиган гулга қўшиқ басталай:

Боғ аро гул қолмагач, мен хору ҳасни на қилай,  
Шоҳ кетиб қолган шаҳарда бир нафасни на қилай?  
Гар қафас бўлса гўзаллик, тўтидирип унда чирой,  
Тўтийи ширинсухан учгач, қафасни на қилай?

## *Олтинчи равза*

### **МУТОИБОТ**

#### **Ҳикоят**

Бир куни Муҳаммад алайҳиссалом бир хотинга:

— Эрингдан сўрагил, кўзида оқи борми? — дедилар.

Ул хотин қўрқиб югуриб кетди ва ҳовлиқиб эрининг ёнига етди. Эри ундан ҳаяжон сабабини сўраганда, ҳазратнинг сўзларини қайтарди. Шунда эри:

— Тўғри айтибдилар, менинг кўзимнинг оқи ҳам бор, қораси ҳам. Аммо бунинг нима айби бор? — деди.

Муқбил киши ҳазил қиласа, айб этма,  
Бу ишга йўл кўяр доим ақлу дин.  
Кўнгил бир оина занг босиб турар,  
Занги кетиб сайқал топар ҳазилдин.

#### **Ҳикоят**

Бир куни халиф тушлик билан машгул эди. Чўлдан бир саҳрои араб келиб қолди. Уни ҳам дастурхонга ўтқизишиди. Араб ўтириши билан дастурхондаги қоврилган қўзи гўштига ёпишиб кетди. Буни кўрган халиф унга деди:

— Бу қандай раҳмсизликки, гүё бу қўзининг отаси сени калла қилгандек бечорани суюгидан шилиб ташламоқдасен ва шундай ғайрат ила чайнамоқдасен?

Саҳроий ҳам бунга жавоб бериб деди:

— Бу ейишлик нарса экан, аммо сен унга шундай шафқат билан боқмоқдасен ва ейилиб кетишидан шундай ташвиш тортмоқдасенки, гүё унинг онаси сени әмизиб катта қилгандек.

Ҳожа ўз молини аяркан дойим,  
Борига ачиниб қарар аввало.  
Қўю қўзисига хатар етишса,  
Фарзанду онасин қиласи фидо.

### **Мутойиба**

Баҳулга дедилар:

— Басра девоналарини санаб бер.  
— Улар сон-саноқсиз, — деди у, — агар ақлмиларни сўрасангиз, санаб берай, улар бир нечтагина, холос.

Ақлли деб билган ҳар бир кишида  
Девоналиктан ҳам бордир бир асар.  
Дунё ташвишидан шу девоналик  
Соясида фақат омонлик топар.

### **Мутойиба**

Фозил бир киши сирдош дўстига мактуб ёзар эди. Унинг ёнида ўтирган бир киши кўз қирини ташлаб мактубни ўқирди. Фозилга малол келди ва: «Агар менинг ёнимда муттаҳам бир даюс хатимни ўқиб ўтирганда

эди, сенга ҳамма сирларимни ёэган бўлардим», деб ёзиб қўйди.

— Худо ҳаққи, мавлоно, — деди ҳалиги одам, — мен сенинг мактубингга қараганим ҳам, ўқиганим ҳам йўқ.

— Эй аҳмоқ, — деди фозил, — бўлмаса, сен нима деяпсан, нима ёзганимни, қайдан билдинг, ахир?

Ким бироннинг сирларин билмоқчи бўлса ёширин,

Ё ўғирлик бирла сир олса чин ўғридир у ҳам.

Гар бу ишга ҳақ талаб этса яна баттар иши,

Номини қўйса ярашгай ё даюс, ё муттаҳам.

### Мутойиба

Боғдод қозиси пиёдалаб Жомеъ майдонига йўл олган эди, олдидан бир маст чиқиб, уни таниб қолиб:

— Худо борингни зиёда қилсин, эй қози, пиёда юриш сенга ярашмайди, — деди ва елкасига қозини миндирмаса, «хотини талоқ» бўлиши ҳақида қасам ичиб юборди.

— Олдимга кел, эй малъун, — деди қози ва унинг гарданига минди. Масти бўлса унга бошини ўтириб:

— Амр эт, тез олиб борайми, секинроқми? — деди.

— Ўрта меъёрда, — деди қози, — фақат гандираклама, йиқилма, бошқаларга халақит бермай, девор тагидан юр.

— Боракаллоҳ, эй қози, — деди масти, — сен суворилик қоидасини яхши билар экансан.

Қозини мачитта етказиб боргандা, қози уни зиндан қилишни буюорди.

— Худо тўғри йўлга солсин сени, эй қози, — деди масти, — сени пиёдалик шармандалигидан қутқариб, ўзи от бўлган ва иззат билан мачитта етказиб келган кишининг сазоси шуми?

Қози кулиб, уни қўйиб юборишга фармон берди.

Эй ҳаким, йўл устидан маст чиқса жанжал ахтариб,  
Эҳтиёткорлик билан топгил мувофиқ йўлини.  
Наздига оқиллар обрўси мисоли қилчадир,  
Жаҳд ила уздирмагил у мастта обрў қилини.

### Ҳикоят

Бир маст уйидан чиқиб, кўчанинг ўртасида ҳаммаёқقا қайт қилиб, учиб қолди. Бир ит келиб, лаб-даҳанини ялай бошлади. Бирор мени тозалаб қўйяпти шекилли, деб ўйлаган маст эса, пичирлаб уни дуо қиласр эди.

— Ҳудо сенинг фарзандларингни ҳам сенга шундай меҳрибон қилсин.

Бирдан ит оёғини кўтариб, унинг башарасига сийиб юборган эди, у: — Баракалла, эй оға, юзимни ювишга иссиқ сув ҳам келтирибсан, — деди.

Шаробни то ҳушдан кеттунча ичиб,  
Мўйловларинг ифлос этсанг беҳаё.  
Бу нопок мўйловни кучуклар келиб,  
Сийдик билан ювса сенга шу раво.

### Мутойиба

Бир бўэчи бир олимга пулинни омонат қўйган эди. Бир неча кундан кейин ўзига керак бўлиб қолди ва олим уйига келди. Олим эшиги тагидаги супада ўтириб, мударрислик қиласр, олдида шогирдлари саф тортиб ўтиришар эди.

— Эй устод, кечаги омонатни берсанг, керак бўлиб қолди, — деди бўэчи олимга.

— Бирпас ўтири, дарсим тамом бўлсин. — Бўэчи кутиб ўтириди, аммо дарс чўзилиб кетди, домланинг дарс вақтида бошини чайқаб қўйиш одати бор эди. Шошиб турган косиб буни қўриб, дарс бериш бош қимирлатишдан иборат экан, деб ўйлади-да, устодга:

— Сен кириб омонатни олиб чиқ, сенинг ўрнингта мен бош иргаб турай, ишим зарур, — деди.

Донишманд буни эшитиб кулиб деди:

Билимдан лоф урар шаҳар фақихи,  
Ҳар илмини билар ошкору ниҳон.  
Ундан не сўрасанг қўл билан имо,  
Ёки бош иргишилаб қиласди осон.

### Мутойиба

Қоронги кечада бир сўқир киши елкасига бир қўзани қўйиб, қўлига чироқ тутиб келар эди. Бир нодон киши унга дуч келиб деди:

— Эй нодон, сенинг наздингда кун билан туннинг фарқи йўқ, қўз ўнгингда ёруғлик билан қоронгиллик бир-ку, бу чироқнинг нима нафи бор?

Сўқир кулиб деди:

— Бу чироқни ўэим учун кўтариб юрганим йўқ, сенга ўхшаган дили кўр ва ақли қисқалар менга урилиб кетмасин ва қўзамни синдириб қўймасин, деб ушлаб юрибман.

Нодон аҳволин тушунгай беаклдан бошқа ким,  
Гар Ибн Синоча бўлган чоғда ҳам илм дониши.  
Таъна қилма қўзи кўрни, эй очиқ қўзман деган,  
Ўзгаларни кўрмаса ҳам кўргай ул кўр ўз ишин.

## **Мутойиба**

Бир гадо бир уй эшигини қоқиб, хайр сўраган эди,  
узоқдан уй эгасининг овози келди.

- Авф этасан, уйда хотинлар йўқ!
- Менга хотинлар сұхбати эмас, бир бурда нон керак,
- деди гадо.

Не бўлса олиб чиқ, қилма баҳона,  
Эшигинг ҳалқасин қоққандан гадо.  
Хотин-халаж зикрин эттандан кўра,  
Бир нима берганинг ағзал ва аъло.

## **Мутойиба**

Бир муаллимнинг ўғли касал бўлиб, ўлимга юз тутди.

- Ювгувчи чақиринглар, буни ювсин, — деди.
- Ҳали ўлгани йўқ-ку, — дейишганди, у:
- Ҳечқиси йўқ, ювгувчи қўлидан чиққунча ўлади, —  
деб жавоб берди.

Ҳар кимки ишда шошар вақтидан аввал,  
Шошқалоқлик унинг юзида битик.  
Ё ҳали кун ботмай очар рўзасин,  
Ёки сувни кўрмай ечади этик.

## **Мутойиба**

Бир муаллимдан:

- Сен каттами, уканг? — деб сўраган эдилар у:
- Мен каттароқман, аммо бир йилдан сўнг у менга  
етиб олади, — деди.

Умринг ҳосили гар ҳеч нарса бўлса,  
Бошқалар ишини санаб толасан.  
Бошқалар умрини этасан ҳисоб,  
Ўз умринг ҳам ўтар билмай қоласан.

### Мутойiba

Бир киши бир кишининг ёнига келиб, гинахонлик бошлаб деди:

— Ажаб, нечун мени танимайсан ва қардошлик ҳаққими ни бажо келтирмайсан?

Ул киши ҳайратта тушиб:

— Бу гаплардан менинг хабарим йўқ-ку! — деди.

— Ахир менинг отам, ёшлигида сенинг онангта совчи қўйған экан, агар у кўнганида, сен билан биз ака-ука бўлар эдик.

— Ундаи бўлса, худо ҳаққи, биз бир-бири миздан мерос талаб қила оладирган қардошлар эканмиз, — деди у.

Хомтама кишилар ҳар бир одамдан  
Эҳсон ундиримоқни фарз деб билади.  
Бундай хомтамаси пишиб етмаса,  
Кўп жафо чекади, дил сиқилади.

### Ҳикоят

Бир золимнинг ҳукмронлик даврида бадавлат киши ва-фот этибди. У золимнинг вазири ўлган кишининг ўғлини чакириб, отасидан нималар қолганини сўрабди.

— Мол-дунёдан фалон-фалон нарсалар қолди, — дебди ўғил, — ворислардан эса вазири кабир ва мен фақиру ҳақири.

**Вазир кулиб:**

— Мол-дунё иккига бўлинсин, ярмини ўғлига бериб, ярми подшо ҳазинасига олинсин, — деган фармон берибди.

Зулм қилувчи вазир етим молидан  
Ҳеч нарса билмас, шоҳ ҳақидан бўлак.  
Ҳаммасини олса адолат билур,  
Ярмини оларкан фазилат, демак.

### **Мутойиба**

**Букридан:**

— Худойи таоло орқангни бошқаларникидек текислаб қўйишини истайсанми, ёки бошқаларникуни ҳам сеникидеқ қиласинми? — деганларида у:

— Бошқаларни ҳам меникidan букри қиласин, токи улар менга ҳозир нечук кўз билан қарасалар мен ҳам уларга шундай назар ташлай, — деб жавоб берибди.

Ғаним таъна қилган айбдан қутулиб,  
Покиза ўтиранг нечоғлик яхши.  
Яна ҳам яхшироқ сенинг нуқсонинг,  
Душманингта ўтса бўлиб дил нақши.

### **Мутойиба**

**Бир киши:**

«Жуҳо ўн дирҳам қарзини бермайди», — деган даъво билан қози олдига келди. Қози ундан:

- Гувоҳинг борми? — деб сўради.
- Йўқ.

— Бўлмаса, бу қасам ичсинми?

— Қасамининг тайини борми?

Ҳар лаҳза ичар юз қасам ёлғон,  
Гүё чўлда араб ичгандек айрон.

Гапга Їхуҳо аралашиб деди:

— Эй мусулмонлар қозиси, бизнинг маҳаллада художўй  
ва тақводор бир имом бор, шуни чақир, менинг ўрнимга  
ўша қасам ича қолсин, токим, бул киши қониқсин.

### Мутойиба

Бир араб туясини йўқотиб қўйиб: «Ким тұямни топиб  
берса, икки түя юқ бераман», деб жар солибди.

— Ҳай, ҳай, — дейишибди одамлар, — наҳотки бир  
оддий туяга икки түя мол ваъда қилсанг!

— Їхим, — дебди у, — сизлар ҳеч қачон йўқолган  
нарсани топиш қувончини бошдан кечирмаган, қўлдан кетган  
нарсага эга бўлиш лаззатини татиб кўрмаган бўлсангиз  
керак.

Йўқолган нарса гар кичик бўлса-да,  
Ҳеч деманг, «қидирма, борми қиймати?».  
Заршунос кишилар билади буни,  
Топганингдан ортиқ топмоқ лаззати.

### Ҳикоят

Бир табиб қачонки, гўристон ёнидан ўтса ё гўристонга  
етса, юзига чодир тутиб олар экан. Ундан сабабини сўра-  
ганиларида, шундай жавоб берибди:

— Бу гўристонда ётган ўликлардан уяламан! Чунки бу ерда кимнингки ёнидан ўтмайин, менинг зарбим остида бўлган, кимни кўрмайин, менинг шарбатимдан ўлган.

Эй, касалга даво топмай бўлган ҳалак,  
Ҳар қадаминг нақд ўлимдан берар дарак.  
Ажал бўлиб, Аэроилни огоҳ этдинг —  
Жон олишнинг меҳнатидан ўзинг, демак.

Сендан табобатнинг синар бозори,  
Сендан ортиб борар бемор озори.  
Аммо Ҳудо ҳаққи, сендан ёзилар  
Югувчи, кафандўз, гўрков хумори.

### Мутойиба

Бир донишманд айтганидек: «Нуқсонли табиб ҳаммага бало, мисоли вабо!».

Эйки, тиб илмидан бехабар табиб,  
Ҳалойиққа ўзинг вабосан, вабо.  
Гар нафратланишса сендан не ажаб,  
Вабо учун нафрат — энг асл дуо.

### Мутойиба

Икки шоир бир базмда дастурхон устида ўтиришар эрди. Ҳолвайтар олиб келишди. Таом ниҳоятда иссиқ экан:

— Бу ҳолвайтар эрта куни жаҳаннамда сен ичадиган қайноқ сувдан ҳам иссиқроқ экан, — деди шоирлардан бири иккинчисига.

— Ҳа, — деди иккинчиси, — ўз шеърларингдан бир байт ўқиб, дам солиб юборсанг, муэдек бўлади-қўяди, сен ҳам тингчийсан, бошқаларга ҳам нафинг тегади.

Совуқ шеърларингдан бир мисрасини  
Дўзах эшигига осдириб қўйсанг —  
Жаҳаннам олови сўнар бир онда,  
Дўзах муэлаб қолар мисоли харсанг.

### Мутойиба

Соҳиб Аббод ҳузурига бир шоир келиб қасида ўқиди. Унинг ҳар байти ўзга бир девондан, ҳар маъноси бошка бир сухандондан эди.

— Ажойиб бир карвон етаклаб келибсан, — деди Соҳиб. — Агар туяларни очиб юборсанг, ҳар бири ўз галасига қайтади, сенинг карвонингда ҳеч нима қолмайди.

Кеча даъво қилиб менга дегандинг,  
«Менинг шеърларим асалдан ширин».  
Девонингта боқиб шуни кўрдимки,  
Ҳар ердан йигибсан унинг байтларин.  
Ҳар бир байти кетса агар жойига,  
Қуруқ қоғоз қолар кўп қуруқ замин.

### Мутойиба

Шоир Фараздақ Басра ҳукмдори Ҳолид номига қасида ёзиб, уни мадҳ этди, аммо кўнглидагича мукофот тегмади. Шунда у қуйидаги икки байтни ёзиб Ҳолидни ҳажв қилди:

Кўрдим ташқариси гўзал бир сарой,  
Қалбимдан эгасин мадҳи олди жой.  
Аммо сарой ичра билмабман не бор,  
Шеъримни булғатди мисли қора лой.

Бу рубоий **Холидга** етишди. У шоирга ўн минг дирҳам ва бир мактуб юборди. Мактубда: «Бу пулларни ўз ичингдан чиқиб, ташингни булғатган нажосатни ювиб ташламоққа сарф эт!», деб ёэилган эди.

Ажабланма қилса эҳсон мақталган киши,  
Маддоҳига ҳеч бир киши ёмон сўз демас.  
Денгизидан ҳадя этиб бир неча қатра,  
Хотиридан ёмонликни юва олса бас.

### Мутойиба

Бир шоир табиб ёнига келиб ҳасрат қилди:

— Бир нарса дилимга гирих ташлаб, тугун тушиб қолди, жуда мени нохуш қилмоқда, ундан ҳаммаёғим сиқи-либ, бутун мўйи баданим тикка бўлиб кетмоқда.

Табиб жуда зийрак киши эди.

— Ҳали ҳеч кимга ўқиб эшиштирмаган бирор шеъринг йўқми? — деб сўради.

— Бор, — деди шоир.

— Ўқи!

Шоир ўқиб берди.

— Яна бир бор ўқи, — деди табиб.

Яна бир бор ўқиб берди.

— Энди кетавер, — деди табиб, — дарддан қутулдинг.

Дилингда тугун тушиб ётган нарса шу шеърларинг экан.

Уларнинг қуруқлиги туфайли сен дардга йўлиқибсан, энди уларни дилингдан чиқариб, халос бўлдинг.

Бу шеър эмас, олим киши ўқиса,  
Дерки, бу маънисиз, bemaza, ak-ak.  
Қизишиштироқ учун bemorga берса,  
Тамоми баданинг тутарди безгак.

### Мутойиба

Бир воиз минбардан туриб bemazadan-bemaza бешта шеър ўқиди ва мақтаниб:

— Худо ҳаққи, мен буни намоз ўқиб туриб, ижод этдим, — деди.

Шу ерда ҳозир кишилардан бирининг қуйидаги сўзлари қулогимга чалинди:

— Намоз устида айтилган шеър бу қадар bemaza бўлса, бунинг ижоди вақтида ўқиган намозда нима маза бўлар эди.

Бир шоир ўқиди bemaza ғазал,  
Дедиким, алифсиз ёздим бу аъло.  
Дедимки, энг юксак санъат бўлурди,  
Шеъринг сўзлари ҳам бўлмаса асло.

### Манзума

Кечаки бир матлани гердайиб ўқиб,  
Дединг: «Бу инждулар кони — баҳо-ку!»  
«Бир баҳрга қандай қаноат қилдинг,  
Шеъринг ҳар мисраси янги баҳо-ку!»

## *Еттиинчи равза*

### **ШЕЪР ВА ШОИРЛИК БОБИДА**

Қадимий донишмандлар ҳукмига қараганда шеър шундай калимадирким, у мақаддимоти хаёл, яъни тингловчи хаёлини қўэфатувчи ва маъноси унга иқбол бергувчиидир. Бу ҳақиқат бўлишидан ёки бўлмаслигидан ва бунга тингловчининг ишониши ва ишонмаслигидан қатъи наэар. Масалан, «май — лаълдир, ё эритилган ёқутдир» ёки «бол — асалари чиқариб ташлаган нарса», деганларидек.

Умуман олганда, донишмандлар бунда вазн ва қофияни эътиборга оладилар. Демак, вазнли ва қофияли калимадирким, унда хаёлнинг бор-йўқлиги ёки ҳақиқатнинг бор-йўқлиги унчалик эътиборга эга эмас.

Ҳақиқатан ҳам шеър нечоғли гўзал, нечоғли фазилатта бой ва нечоғли юксак. Шеърдан буюкроқ фазилат бормикан?! Шеърдан сеҳолироқ сеҳр бормикан!?

Борми ҳуснга шеърдан кўра бой,  
Хатидан четта чиқмайди чирой.  
Агар киришиб кетган эса дил,  
Тасалли ва сабр бермоқлик мушкул.  
Унинг вазнига қанча дил гадой,  
Қофиясидан этакда чирой.  
Радиф халхоли безатур оёқ,

Ҳолидан хаёл ошади мутлақ.  
Ташбиҳидан руҳ ойдек жилвагар,  
Йўлдан озганнинг ақлини олар.  
Тажнистан сочин иккига бўлиб,  
Ундан икки соч ўрумин ўриб —  
Лаблар тарсаъдан гавҳар сочади,  
Ўрим соchlарига гавҳар осади,  
Илҳом кўзидан қисилар кўзи,  
Анжуманда кўплар фитнанинг ўзи.  
Юзига ташлаб мажоз кокилин,  
Пардадан чўзар ҳақиқат тилин.

Шеър бир неча қисмдан иборат, масалан: қасида, ғазал, маснавий, қитъя ва рубоий каби.

Шоирлар булардан фойдаланишда бир-биридан фарқ қиласди. Баъзилари ҳамма турларда ҳам шеър айтганлар, баъзилари эса, айрим қисмларига кўпроқ эътибор берганлар.

Масалан, қадимги шоирлар мадҳ, воизона ва бошқа қасидаларга аҳамият берганлар. Баъзилари маснавийга эътибор берганлар, охириги вақтдаги шоирларнинг аксари яти ғазал йўлига тушиб олганлар.

Шоирларнинг сони саноғи йўқ. Уларнинг ҳар бири ҳақида муфассал гапиришга ҳеч имкон йўқ. Шунинг учун фақат бир неча машҳурларнинг номини тилга олиб ўтиш билан кифояланишга мажбурмиз.

## РУДАКИЙ

Рудакий... Мовароуннаҳордан бўлиб, онадан кўр туғилган. Аммо шундай эйирак ва закий бўлганким, саккиз ёшида Қуръон хатм қилиб, қориликка ўтган ва шеър ҳам ижод қила бошлаган. Чиройли овози туфайли ашула айтиш ва

уд асбобида куй чалишга киришиб, бу санъатда маҳорат кўрсатди. Наср ибни Аҳмад Самоний уни қанотига олди.

Айтишларига қараганда, унинг икки юз ғуломи бўлган, юклари ва кўчларини 400 туяга ортиб юрган. Ундан кейин ўтган ҳеч шоир бундай бойликка әга бўлолмаган.

Унинг шеъри ал-уҳда-ала-р-ровий юз дафтар бўлган. «Шарҳи яминин» китобида хабар берилишига қараганда, унинг шеърлари, минг карра минг байт ва яна уч юз байт бўлган.

Бу шароб ҳақидаги сўзлар унинг сўзларидан:

У ақиқ ранг майнин ким қўрса,  
Эритилган ақиқ дея олди.  
Иккиси аслида биру лекин  
У эриди, бу ях бўла қолди.  
Кўл тегизмай туриб қизарди қўли,  
Ичмаёқ кайф бошда қўзғалди<sup>2</sup>.

Куйидаги пандни ҳам у айтган:

Замон менга жуда қиммат насиҳат этди,  
Агар билсанг замон тўла насиҳат эрур.  
Деди: «Ўздан баландроқни кўриб, ғам ема,  
Кўп киши бор, сен бўлишни орзу қилур».

Баъзи тарихларда айтишларича, Наср ибни Аҳмад Бухордан Марвдаги Шоҳ-жаҳон қароргоҳига сафар қилган эди. У ерда унинг туриш муддати чўэилиб кетди. Аркони давлатнинг хаёли Бухоро, унинг қасри ва боғларига банд бўлди. Рудакийга катта инъомлар ваъда бериб, Наср ибни Аҳмадда Бухорога қайтиш ҳиссини уйғота оладиган

---

<sup>2</sup> М.Мўйинзода таржимаси

бир неча байт ижод қилиб, уд билан куйлаб беришни илтимос қилдилар.

Бир куни эрта билан подшо сабуҳий қилиб ўтирган пайтда қуидаги байтларни уд овозига жўр қилиб ўқиди:

Мўлиёнинг ҳиди бу ён келадур,  
Меҳрибон ёр ёди шу он келадир.  
Амунинг қумтоши оёқ остида  
Пардек юмшаб роҳати жон келадир.  
Қанчалик тошса да Аму сувлари,  
Отимиз қорнидан тубон келадир.

Эй Бухоро, шод бўл ҳам шод кул,  
Сен тараф шоҳ шод меҳмон келадир.  
Шоҳ сарвдир ҳам, Бухоро бўстон,  
Осмонга ой нурафшон келадир.  
Шоҳ сарвдир ҳам, Бухоро бўстон,  
Бўстонга сарви равон келадир.

Бу байтлар Наср ибни Аҳмадга шундай таъсир этдиларки, уй кийими ва кафши билан отта миниб, бир манзил йўл юрди.

Аммо бошқа манбаларда Султон Санжар ва шоир Муиззий ҳақида ҳам шундай ҳикоя қиласидар. Ҳақиқатини худо билади.

## ДАҚИҚИЙ

Дақиқий қадимги шоирлар жумласидан. «Шоҳнома»ни у бошлаган, минг байтта яқин ёзгандан кейин Фирдавсий уни охирига етказган.

**Қуйидаги икки байт унинг шеърларидан:**

Мен пари авлодидин бир ёрни таңлаб эдим,  
Бир йўла гум бўлди кўздан ул пари пайкал мисол.  
Кетди лашкар, лашкарларимни енгтан ул бут ҳам чунон,  
Ҳеч киши дил бермасин, лашкарга бўлган поймол.

**Бу қитъя ҳам уники:**

Бунда жуда узоқ қолдим, хор бўлиб,  
Аэзиз узоқ қолса доим бўлур хор.  
Оқмай туришидан сасиб кетади —  
Мева ичра сув ҳам жим турса бисёр.

## **ИМОРА**

Қадимги шоирлардан, самонийлар даврида яшади, хуштаъб ва дилкаш шеърлари бор, жумладан қуйидаги байтлар шуники:

Жаҳон бир неча вақт қордан,  
Магар сиймин бўлиб турди,  
Зумуррад келди-ю бирдан кумушнинг ўрнини олди.  
Баҳор келганда ул кашиб нигористони ҳам барча  
Бүёқларни қилиб таслим, гулистон ҳуснига солди.

**Бу қитъя ҳам ўшандан:**

Жаҳон сени аэзиз тутса бўлма мағрур,  
Кўп ҳам ўтмай хор қилмоғи мумкин жаҳон.  
Жаҳон илон, илонни ким этса таслим,  
Охир бир кун ўч олади ундан илон.

Тариқат султони Шайх Абу Саид Абулхайр мақомотида айтилмишким, бир куни қоввол ул киши ҳузурида қуийдаги байтни ўқимишдир.

Ўз ғазалим ичига беркинмоқни истайман,  
Ўпib олай лабингдан сен ўқиган замонинг.

Шайхга бу жуда ёқибди ва:

- Бу кимнинг шеъри? — деб сўрабди.
- Иморадан.
- Туринг, унинг зиёратига бормоқ даркор, — дебди шайх ва бутун муридлари билан бориб Имора қабрини зиёрат этибди.

## УНСУРИЙ

Ўз асри шоирларининг сардори бўлган. Аминуддовла Маҳмуд Сабуктегин уни марҳамат назари остига олган ва қуийдаги рубоий ундан қолган:

Зулфинг ўз рангини олмиш дилингдан,  
Ишқимиз зангини олмиш дилингдан.  
Йўлбарс кибри бордир дилингда сенинг,  
Мумдек дилим сангини олмиш дилингдан.

Унинг султон мадҳига бағишланган маснавийлари қўп бўлган дейдилар. Улардан бирининг номи «Вомиқ ва Уэро». Аммо уларнинг ҳеч биридан асар қолмаган.

## АСЖАДИЙ

Асжадий марвлик бўлиб, Яминуддовла маддоҳларидан бири бўлган ва унинг Ҳиндистондаги ғалабаларига бағишланган қасида ҳам ёзган. Унинг матлаи қуидаги:

Суманта шоҳ сафар қилди, аниқ яқин-йирори,  
Ишларни кўр, сафар эмас мўъжизотнинг байроғи.

Қовун васфида у шундай дейди:

Ул забаржад рангу мушкин бўю таъмидир асал,  
Уд иси анқиб туродир тўни шоҳи бекасам.  
Сўйса янги ой ўроғидек чиқар ҳар бир тилим,  
Сўймаса ой қурсидек порлаб туродир унда ҳам.

## ФАРРУХИЙ

Яминуддовла даврида яшаган, унинг инъомлари фазилатларидан анча бойлик ортирган. Самарқанд сафарини юстиёр қилган. Шаҳарга яқин келганда, қароқчилар бор-йўғини талаб олганлар. Самарқандга кириб ўзини ҳеч кимга танитмаган. Бир неча кун туриб, қуидаги қитъани ёзиб қайтиб кетган:

Самарқандни бошдан-оёқ қездим ман,  
Назаримдан ўтди боғ-роғ, тоғу тош.  
Динору дирҳамдан чўнтағим холи,  
Хуррамлиқдан холи бу дили бевош.  
Жаннат боғи, кавсар битта деб,  
Шоирлар, воизлар сўзлар оҳангдош.

Минглаб жаннат боғи, минглаб кавсарни  
Бу ернинг бир кичик боғи этар фош.

Ноз-неъмат ичида бўлмаса пулинг,  
Гўё олтин тосда ётган кесик бош.

## ФИРДАВСИЙ

У Тус шаҳаридандир. Унинг фазилати таърифи ва камолоти тавсифи маълум. Ундан ташқари «Шоҳнома»дек асари бор кишига таъриф ва тавсиф бекор. Айтишлари а қараганда, у дехқончилик билан машғул бўлган. Унга зулм қилганлар, у зулмданadolat истаб Султон Маҳмуд пойтахти Газна шаҳрига жўнаган. Ул ерга етиб келиб, Газна боғидан ўтиб кетар экан, мушоира қилиб ўтирган уч кишини кўриб қолибди. Уларнинг Султон мулоэимлари эканлигини тушуниб, ўзига: «Шуларнинг ёнига борай ва ҳолимдан хабар берай», дебди. Уларнинг олдига етиб келганида, улар бундан чўчишибди ва: «Бу киши бизнинг мажлисимиэни бузмоқчи», дейшишибди да, ўзаро шундай аҳд қилишибди: «Яхшиси, у келгандা биз подшонинг шоирларимиз, биз билан фақат шоирларгини сұҳбатда бўла олади, деййлик ва уч мисра шеър айтайлик да, сўнгра унга кимки тўртингчи мисрани айтса, биз у билан сұҳбат қиламиз, бўлмаса, бизни кечиринг, деййлик».

Фирдавсий уларга етиб келиши билан ўзаро келишибган гапни айтишибди.

— Қани, айтган мисраларингизни ўқинг, — дебди Фирдавсий.

Шунда Унсурий ўқибди:

Ой ҳам жамолингдек бўлолмас равшан,

Сўнг Асжадий дебди:

Юзинг тенги гулни тополмас гулшан.

**Унга Фаррухий қўшибди:**

Кипрингин ўқидан тешилур шавшан,

Фирдавсий бу мисраларни эшитиши биланоқ бадиҳа қилиб дебди:

Гив найзасин жангда кўргандек Пашан.

Улар бу мисрадан ҳайратта тушибди. Гив ва Пашан қиссасини айтиб беришни илтимос қилишибди. У хулоса қилиб айтиб берибди.

Шундан кейин у султон мажлисига ноил бўлибди, унинг назари марказидан жой олибди.

— Бизнинг мажлисимиизни жаннат қилдинг, — дебди.

Шунинг учун у ўз тахаллусини Фирдавсий деб олибди. Бир неча бор келганидан кейин унга «Шоҳнома» ёзиш топширилибди. Унинг минг байтини ёзив, Султон қошига келтирди, унинг таҳсинига сазовор бўлибди ва минг динор қизил олтин инъом олибди.

Кейин ўтгиз йил давомида «Шоҳнома»ни тутатибди, Султон қошига олиб борибди ва аввалги берилган кўрсатмага биноан ҳар мисрага бир олтин динор олиш умидида бўлибди. Ичи қоралар унга ҳasad қилиб: «Бу шоирнинг нима ортиқлиги бор, бунчалик инъом унинг диморини қўтариб юборади», дебдилар ва унга олтмиш минг кумуш дирҳам ҳақ тайин этибдилар.

Фирдавсий бундан жуда ранжибди.

Айтишларига қараганда, унга дирҳамларни олиб келишган пайтда шоир ҳаммомда экан. Ҳаммомдан чиққач, 20 минг дирҳамини ҳаммомчига, 20 минг дирҳамини бир неча коса фаққо ичгани учун фаққочига, қолган 20 минг

дирҳамини эса инъомни олиб келган мулозимларга тақсим қилиб берган ва қирқ байтли шеър ёзиб, Султонни ҳажв қилган. Бу ҳажвда жумладан қуйидаги мисралар бор:

Шоҳлардан бўлсайди бу шоҳга падар,  
Кийгизган бўларди менга тожи зар.  
Агарда онаси бўлсайди хондан  
Тиллога кўмарди мени нақ сондан.  
Улуғлар зотидан бўлмаган чун шоҳ,  
Улуғлар отидан бўлур дил сиёҳ...  
Аччиқ мевали бир дарахтни агар,  
Жаннатнинг боғига кўчат қилсалар —  
Кавсардан сув ичса, чанқаган маҳал,  
Сув эмас, берсалар шарбату асал.  
Етилгач, ҳосил ҳам беради ахир  
Ва лекин, меваси бўлади тахир...  
Зоти пастларга ҳеч умид боғлама,  
Қаро тун оқармас, дилинг дорлама.  
Жаҳонгирнинг номи бўлганида пок,  
Билимдонлар дили бўлмас эди чок.

Шундан сўнг у қочиб кетибди. Уни қанча қидиришмасин, топишолмабди.

Бир қанча вақтдан кейин вазир Ҳожа Ҳасан Маймандий шикоргоҳда «Шоҳнома»дан вазиятига лойиқ бир қанча байтни ўқибди. Султонга жуда маъқул тушибди ва:

— Бу шеър кимники? — деб сўрабди.

Султон ўз қилмишидан пушаймон бўлибди ва Фирдавсий ҳақи бўлган олтмиш минг олтин динорни маҳсус сарпо билан Тусга жўнатиш ҳақида фармон берибди.

Аммо шоирга толе кулиб боқмабди. Айтишларига қарангандা, Султон ҳадяси Туснинг дарвозасидан кирганида, иккинчи дарвозадан Фирдавсий тобути чиқмоқда экан.

Ундан бир қиз қолган экан, ўшангага арз этишибди. У ҳиммат билан рад этиб, инъомни қабул қилмабди.

«Менинг турмушимга етарли молу неъматим бор, — дебди у. — Бунга эҳтиёж йўқ».

Султон гумашталари у маблағни ўша ерда работ қуришга сарф этишибди.

Киши қадрин билиш яхши, эгилган осмонга боқ,  
Турибдир ҳодисотдин ўқ териб отмоқчи ҳар дамда.  
Кетиб оламдин ул Маҳмуд, йўқолмиш шавкату шони,  
Қадросиз қилди шоирни, деган гап қолди оламда.

## НОСИР ХУСРАВ

Хусрав Ансорийнинг ўғли Носир Хусрав шеър санъатидан моҳир, ҳикмат илмида комил эди. Аммо уни динсизлик, даҳрийлик ва кофириликда айبلاغалар.

Унинг «Сафарнома» китоби бор, у кўп мамлакатларга сафар қилган ва олимлар билан қилган суҳбатларини наэм қилган. Унинг қўйидаги байтларини Айнулкузот «Зубдатул-ҳақойиқ» китобида келтирган.

Мен булғорилардан кўп азоб чекдим,  
Шунингчун арзиди айласам фитон.  
Булғориларнинг ҳам йўқдир гуноҳи,  
Эй худо, рост айтсан фитна ўзингдан.  
Кўрқаман айтишдан йўқ менда имкон,  
Хитой гўзалларин лаб, тишларини  
Керак эмас эди бунча гўзаллаш.  
Уларни кўрганда ҳайратда қолиб,  
Лозим эмас эди бармоқни тишлаш.

(M.Mўйинзода таржимаси).

## АМИР МУИЭЗЗИЙ

Муиззий султон Санжар ибни Маликшоҳ даврида яшади ва унга мадҳиялар битди. Муиззий тахаллуси ҳам Санжар номи билан боғлиқ. Муиззий топган шуҳратта ва у етишган олий даражага камдан-кам шоирлар мұяссар бўлган.

Фақат уч шоир уч давлат соясидан баҳту иқбол топган дейишади: бири Рудакий Самонийлар давлатида, иккинчиси Унсурний Маҳмуд давлатида ва Муиззий Санжар давлатида.

Вафотининг сабаби қўйидагича:

Бир куни Султон чодиридан чиқмай ўқ узган эди, ул ўқ хато кетиб ташқарида турган Муиззийга тегди. Шоир шул ондаёқ жон берди.

Кўйидаги бир неча байт унинг араб шоирлари йўлида ёзган қасидасидандир:

Эй сарбон, тўхтамагил то келмас ёр манзили,  
Вайронаси узра туриб, вайрон ўлур ошиқ дили.  
Остонасини хун қилур, вайронасин жайхун қилур,  
Тупроқларин гулгун қилур кўзимдан оққан хун сели.  
Ёрим юзи ширмонидан, ҳам лаблари хандонидан,  
Сарв қомати жавлонидан айрилдими бўстон гули.  
Бунда турарди дилситон; дўстларга тўлган бўстон,  
Энди бўриларга макон, ё қарғаларнинг манзили.

## АДИБ СОБИР ТЕРМИЗИЙ

Шириңсухан шоир, доно олим бўлган. Унинг шеърларида латофат ва малоҳат камолга етган, фозил шоирлар унинг санъатига қойил қолганлар. Масалан, Анварий ўз камолотини санаб ўтган бир қитъаси охирида Собирни ўзидан юқори қўйиб, шундай дейди:

Барчанинг қўй, тоза шеърим бирла келганман ҳамон,  
Гарчи Собир бўлмасам ҳам мен Саноий тоифа.

**Собир шеърларидан намуналар қуйидагилар:**

Эй юзинг жаннату лабинг салсабил,  
Жаннат, салсабилинг учун жон сабил.  
Ишқингда дил тоат қилиб билдиким,  
Тоатдан муроди: жаннат, салсабил.  
Юзинг шуъласидан зуҳро қамашар,  
Қуёш жамолингдан бўлади хижил.  
Сенда Боғдод ҳусни, Миср жамоли,  
Боғдод ҳусни Дажла, Мисрники Нил.  
Ҳижронинг юқидан қаддим бўлди дол,  
Ишқинг ярасидан юзларимда нил.

\* \* \*

Давлат асбобидир давот, эй ўғлим,  
Бебош бу давлат у билан ром бўлсин.  
Давотни гар давлат қилмоқ истасанг,  
Алифга чизиқ қўш, токи лом бўлсин.

## **АНВАРИЙ**

Доно, фасоҳатли, фозил ва камолот әгаси бўлган.  
Шеърлари ҳусну камоли ва назмнинг лутфу жамоли унинг  
бутун улуғлигидан бир қатра, холос. Унинг шеърлари ма-  
шҳур, девони мастур. Унинг латиф ашъоридан қуйидаги  
қитъя шонирларга насиҳат тарзида ёзилган:

Кече бир шоир деди: «Ёзмоқдадурсанму ғазал?»  
Мен дедим: «Құл силтадим мадхиданам, ҳажвиданам»,  
Ул деди: «Нечун?» Дедим: «Гумроҳлик әркан ҳаммаси,  
Үтди гумроҳлик бу таъбга қайта келмайдир ҳечам.  
Ҳам ғазал ҳам мадху ҳажвиёт ёзардим шул учун,  
Ким ғазаб устига ҳирс шаҳват бари бўлганди зам.  
Қистар әрди тунлари шаҳват ити «ёз-ёз» дея,  
Ул шакарлаб васфини қадди баланду зулфи ҳам.  
Ҳирс эса кунлар бўйи бермасди ором бир нафас.  
Дерди: «Қайдан бўлса ҳам топмоқ керақдир беш дирам»,  
Нақ қутурган ит каби қўнглим аро ҳирсу ғазаб,  
Истади дунёда ким эрса, бўлсин пасту кам.  
Охири Оллоҳ бу уч ит дастидан этди ҳалос.  
Бу мен онгсиз бандага меҳру ҳидоят ҳам карам.  
Ҳажвиёт, мадху ғазалларни ёзиб, Оллоҳ, кечир,  
Кўп нафсларга жафо қылдим-ку оқилга ситам.  
Анварий, лоф урмак эрмас мардга одат ҳеч маҳал,  
Энди бир бурчак топиб умринг нажотин излаги.  
Кўп узоқ бормайди бул умр деган, уч-тўртта дам...

Ривоятга кўра, Fўр ҳокимиға Анварий сенинг ҳақинг-да ҳажв ёэди деб хабар берганлар. У Ҳирот ҳокимиға мактуб йўллаб, Анварийни унинг ҳузурига юборишни талаб этган ва унга меҳрибонликлар кўргазажаклигини иэҳор қилган. Аммо у Анварийдан ҳажв учун қасос олмоқчи бўлган. Ҳирот ҳокими бундан хабардор бўлса ҳам, Анва-рийга очиқдан-очиқ айттолмаган. У Анварийга Fўр ҳоки-ми илтимоси ҳақида мактуб йўллар экан, қуйидаги тўртлик-ни мактубга қистириб кетган:

Бу ҳаёт аслида шундай сўз дейди:  
«Ҳар ишимда мудҳиш, куч қудратим бор,

Ишларим кўз ёши тўқмакдир менинг,  
Кулганимда яшнаб турса-да баҳор».

Эйрак шоир гап нимада эканлигини дарҳол сезган ва баҳона топган. Ҳирот ҳокими бу баҳоналар билан Fўр ҳокими таклифини рад этган.

Кўп вақт ўтмай, Fўр ҳокими яна бир мактуб йўлланган. Унда яна Анварийни сўраттирган ва унинг эвазига бир минг қўй ваъда берган. Шунда Ҳирот ҳокими Анварийга чопар юбориб деган:

— Энди сен хоҳласанг, хоҳламасанг Fўрга жўнашинг керак, чунки сенинг эвазингта, менга мингта қўй ваъда этилган.

Анварий ҳоким ҳузурига келиб деган:

— Эй шоҳим, наҳотки сен бошқа бир ҳукмдор минг қўй баҳо қўйған кишининг ўз ҳузурингда текинга хизмат қилиб беришини истамасанг! Рухсат эт, токи умрим охиригача яқинларинг аро юрай, хизматингда бўлай ва ҳар бир қадаминг васфига сўз жавоҳирларини сочай.

Бу сўзлар Ҳирот ҳокимига маъқул тушган ва шоирни ўз ёнида қолдирган.

## РАШИДИДДИН ВОТВОТ

У Мовароуннаҳр шоирларидандин. Ўз даври шоирларига бошлиқ ва раҳнамо эди. Шеър санъати ҳақида «Ҳадойиқ-ус-сеҳр» («Сеҳр боғлари») китобини ёзган.

Бир вазирга қараб шундай деган:

Сен вазиру мен сенинг маддоҳинг,  
Совғасиз бўш қўлим сенгами раво?

Вазирлигинг менга топшириб кўр-чи,  
Не бўлур кўрурсан шоирга ато.

Кўйидаги икки рубоий ҳам унинг табиатидан туғилган:

Юзларинг ёдида юрибон нолон,  
Сен бехабар, кезиб чиқдим-ку жаҳон.  
Барчадан қўл ювдим, сенсиз, эй жонон,  
Ўтган умр ўтар, бошқасиз осон.

\* \* \*

Кўзларимда доим дўстим сурати,  
Дўст суратимасми кўзим давлати?  
Ажратиб бўлмайди дўстни дийдадан,  
Билмаймен кўзми бу ё дўст неъмати?

## АФЗАЛИДДИН ҲОҚОНИЙ

Шеър камолоти учун у «Ажам Ҳасани» деган лақаб олган. У услубда барча шоирлардан мумтоз ва унингдек ажойиб шева оз.

Насиҳат ва ҳикматда ҳаким Саноий йўлидан кетди ва маънода ўз асрдошлиаридан ўзиб камолга етди. Ўзи ҳақида ифтихор ила қўйидаги қитъани ёзган:

Мен янглиқ шоири, ёздим дастурхон,  
Увоқ терар Унсурӣ ва пийри Рӯдак.  
Донолик била номинг асрлар ўчмас,  
Ҳикматдан матойим кўп, ҳирс йўқдир андак.

Унинг васфида Рашидиддин Вотвот демиш:

Эй шариф осмонин қүёши мөҳи,  
Эй, афзал тахтининг шавкати шоҳи.  
Афзалиддин ўзинг, фазл суюнчи,  
Ҳар сўзинг имонинг таянчи такягоҳи.

Куйдаги тўртлик ҳам унинг қитъаларидан:

Гўзалларга кўнгил берма, Ҳоқоний,  
Бундан ақл хиралашар бегумон.  
Гўзалларнинг чехраси бир оина,  
Юзи равшан қапт-қародир ул томон.

«Туҳфат-ул ироқайн» («Икки ироқ туҳфаси») номли маснавийси ҳам бор. Куйидаги бир неча байт шу маснавий бошланишидан:

Тикиламиз дунё ишига ғамнок,  
Мовий гумбаз бунда ва доира хок.  
Гумбаз-ку, доира то ўз жойида,  
Жойида умр рамзи тартиб, қоида.  
Шулар гарданида ажаб бир фармон,  
Доира жойида айланур осмон.  
Ажаб ҳолат келар кеча ё кундуз,  
Булардан туғилар қоқум ё кундуз.  
Вақт еттики, тўртта ҳаммол бирма-бир,  
Охир олиб кетса йўқлик амири.  
Вақт еттики, тўртта ҳаммол бирма-бир,  
Тахти равонларин қўйсалар охир.  
Вақт еттики, юлдуз уловлари ҳам,  
Туёғу тақасин ташласа боҳам.

## ФАХР ЖУРЖОНИЙ

Ўз даврининг энг фозил ва ҳурматли кишиларидан бири.  
Унинг камолот ва шеърдаги маҳорат ва зарофат мезони  
«Вис ва Ромин» китобидир.

Ҳозир бу китоб сийрак ва ноёб.

Бу байтлар шул китобнинг турли жойларидан олинган.

Оlamни билганлар демишлар чунон,  
Жангни ташқаридан кўрмоқлик осон.

\* \* \*

Ўшал олтин идиш менга не керак,  
Агар қоним ёвлар унга солажак.

\* \* \*

Илоннинг боласи илондир, илон,  
Заиф шохдан ёмон мевадир нишон.

\* \* \*

Сафар осон эмас, соғлиқда ҳар чоқ,  
Заиф беморликда нечук бўлур боқ?

\* \* \*

Наргиз гули кўзга кўринар гўзал,  
Аммо аччиқ қотил чайнаган маҳал.

\* \* \*

Гуноҳ әлдан яширмоқ жим ўтирмоқ,  
Вале ундан ёмон ёлғон гапирмоқ.

\* \* \*

Подшонинг тимсоли олов-аланга.  
Оловдан бошини чўзар баландга.

\* \* \*

Шижаатда шеру кучда бўлсанг фил,  
Куйдирап оловга ташланма дадил.

## НИЗОМИЙ

Низомий ганжаликдир, камолот ва фазилати равшан ва шарҳлашга муҳтож эмас, «Беш хазина» китобида қўлга киритган назокати ва латофати ҳеч кимга муюссар бўлмаган, балки, умуман одамзод қудратидан ташқари. Бу китобдан ўзга ҳам шеърлари бор деб ривоят қиласидар.

Куйидаги ғазал шулар жумласидан:

Заҳмати донолари буғдой юзи ойдиндур,  
Тун бўйи ранг сомону дил уза тўлган хундир.  
Сунбул устида пишибдур ўша буғдой донаси,  
Бошоги камгарину сунбулайи гардундир.  
Мен сира тотимадим буғдойини сабрим еб,  
Кутмаган энди қувилмоқ бу бехиштдин чиндир.  
Икки зулдини тарозусида хол арпа десам,  
Яна буғдой тиларам баски, сўзим мавзунидир.  
Ғамидан қалбим эрур нимта чунон буғдойдек,  
Қайғудан арпа, Низомий, бўлишим мумкиндири.

## САЛМОН СОВАЖИЙ

У фасоҳатли шоир ва камолотли сухандон. У ифодада ва ишорада беназир.

У устозларга жавоб қасидалари ёэди. Уларнинг баъзилари, устозлардан ортиқроқ, баъзилари пастроқ ва баъзилари уларга баробар келади. Уларда ўзига хос ифодалар ва образлар жуда кўп, устозлардан айниқса, Камол Исмоилдан олганлари ҳам кўп, аммо бунинг учун шоирни маломат қилиб бўлмайди, чунки бу образлар Соважий шеърида шаклда гўзалроқ ва услубда ёқимлироқ.

Яхши мазмундир пок бадан шоҳиди,  
Ҳар лаҳза ўзгача либос кийса ҳам.  
Ор келтирас үнга эскирган кийим,  
Мазмунга яраша кийим бер ҳар дам.  
Ҳунар шулким, эски жул либосини,  
Ечиб, кийдиролсанг шоҳи беқасам.

Унинг икки маснавий китоби бор, бири «Ҳамшиду Ҳуршид» бўлиб, унинг услуби сертакаллуғлигидан бадиинёт чегарасидан чиқиб кеттан. Иккинчиси, «Фироқнома» деб аталадиган бадиинётда юксак ва назмиётда латиф. Унинг разаллари ҳам дилкаш ва санъатта жуда бой. Аммо разалдан мақсад ишқ-муҳаббат туйғусини ифода этишдир. Унинг разаллари бундан холи бўлгани учун завқ аҳли таъби уларни қабул этмайди.

Унинг қитъаларидан бири будир:

Эй дил, ҳирс қучорин тўлдириб бўлмас,  
Ўртаси бўш «таъма» сўзига лаънат.  
Азиизим, дарвешлик әшиғин қоққин  
Таъма, хорлик берар, қаноат иззат.

Бой оёғи тойиб кетса, кўп оғир,  
Дарвеш саодатин билгил қаноат.

## ШАЙХ САЪДИЙ

Унинг номай Муслиҳиддин, Саъдий тахаллуси унинг ҳомийси номидан олинган. У ғазалсаро шоирлар раҳнамоси. Унгача ҳеч ким ғазал йўлини ундаи босмаган эди. Унинг сўзлари ҳамма тоифаларга маъқул тушди. Унинг ҳақида бир шоир қуидаги мисраларни ёзмиш ва ҳақиқатан инсоф гавҳарини тиэмиш:

Шеър оламида пайғамбар учта,  
Гарчандки, «ло набия баъдий».  
Достону қасидаю ғазалда  
Фирдавсию, Анварио, Саъдий.

## ҲОФИЗ ШЕРОЗИЙ

Шоирлар раҳнамоси Ҳофиз Шерозий — унинг аксар шеърлари латиф ва табиий, баъзилари эса мўъжиза чегарасида, равонликда ва ёрқинликда. Зоҳирий қасидалари бошқалар қасидасидан ўтганидек, Ҳофиз ғазаллари ҳам бошқалар ғазалидан ўтиб кетади. Унинг шеърий завқи Низорий Қўҳистонийнинг бадиий завқига тўғри келади, аммо Низорий шеърлари унинг шеърларидан фарқли ўлароқ, фазилатлари билан бирга камчиликлардан ҳам холи эмас.

Ҳофиз шеърларида сунъийликдан ҳеч асар бўлмагани учун унга «Лисонул ғайб» (Ғойиб тили) лақабини бердилар.

## КАМОЛ ХЎЖАНДИЙ

Шайх Камол Хўжандий сухан латофати ва маъно заррофатида шундай мартабага қўғарилдиким, ундан ортиқни тасаввур этиб бўлмайди. Аммо унинг шеърлари, муболага-

нинг ҳаддан ошиб кетиши натижасида лўндалигини йўқотди ва ишқ-муҳаббатдан холи бўлиб қолди.

Шеърга маталлар киритиш, равон вазн ва ноёб қофи-ялар ҳам радифлар ишлатишда етиб бўлмас соддалик маҳоратини кўрсатди.

У Ҳасан Деҳлавийга пайровлик қиласи. Аммо бунинг шеърларидағи каби латиф маъно Ҳасан шеърларида йўқ. Уни «Ҳасан ўғриси» деб аташлари сабаби ҳам шу пайровлик бўлса керак. Унинг баъзи девонларида мана бу байт учрайди.

Раҳна тепасинда мени тутмади ҳеч ким,  
Аммо маълум бўлди Ҳасан ўғрисиман.

Шайх Камол ва Ҳофиз сұхбатига мушарраф бўлган орифлар: «Шайхнинг сұхбати шеърларидан яхшироқ эди. Ҳофиз шеърлари эса унинг сұхбатидан яхшироқ», дейдилар.

## ХУСРАВ ДЕҲЛАВИЙ

Амир Ҳусрав Деҳлавий шеърда хилма-хилдир. Қасида, ғазал, маснавий ижод этган ва ҳаммасида камолга етган. Ҳоқонийга пайровлик қиласи. Унинг қасидаларига етолмади, аммо ғазалда ундан ўтиб кетди. Унинг ғазалларидағи маънолар барчага маълум ва ишқ-муҳаббат аҳли ўз за вқи ва виждонига қараб қабул қилиши мумкин бўлгани учун ҳаммага маъқул.

Низомий «Ҳамса»сига кирган маснавийларидан бошқа ҳам достонлари бор. Унинг ҳамма достонлари табиий ва моҳирона ёэилган.

## ОРИФ ҲАРАВИЙ

«Гүй ва чавгон» мунозарасининг муаллифи. Бу жуда моҳир ёзилган мунозарадан от сифатида айтилган мисралар қўйидагилар:

Осмон коптогини босганида гард,  
Коптоқдек сақратиб от чопганда мард —  
Ҳар сафар ҳам терга бўлганида гарқ,  
Ёмғир қуяр эди ўртасида барқ.  
Тақасидан олов учқун тўкарди,  
Пишқирса дамидан бўрон қўпорди.  
Коптоқ тепасида айланган замон,  
Ёнгин тутунидан қўтарар тўзон.  
Ёв-ла олишмоққа киришса агар,  
Юз бўрон чанг билан тўзон қўтарар.  
Тоғлар тепасидан селдек ўтарди,  
Дарё, денгизлардан елдек кечарди.

## АЛИШЕР НАВОИЙ

Бизнинг замонамиз бу соҳиб давлатвужуди ила мушаррафидир. У ўз мартабаси, улуғлиги ва шоҳга яқинлиги ва шунингдек Оллоҳ ато эттан ва ўқиши ўрганиш билан ортирилган илму дониши ва ақлу заковати билан шеърлари ҳусни камоли учун ҳар қандай мақтовордан юқори турсатда, у ўзини паст тутиб, шеър аҳли жамоасига қўшилди ва бошқаларга ҳам пардан орадан кўтариб, шеърнинт йўлини очиб берди. Аммо ҳаққониятини айтганда, у мана шу анжуманларнинг барчасига бошлиқ ва шеър аҳли сардафтарида номи битик.

Унинг покиза номини қўйидаги муаммодан чиқариш мумкин:

Асл номига киши топмас тахаллусдан имо,  
Ким тополса лаблари узра инар жонбахш наво.

Табиати тақозоси ва қобилиятига кўра у туркий ва форсий шеърларида юксалишга мұяссар бўлган бўлса-да, туркийга кўпроқ майллик кўрсатди ва бу тилдаги ғазалиётти ўн минг байтдан зиёдроқ бўлди.

Низомий «Ҳамса»си муқобилида ёзган маснавийлари уч минг байтга яқин ва бу тилда ҳеч ким бунчалик кўп ва хўб шеър ёзмаган.

Форсий шеърлари орасида Амир Ҳусрав Деҳлавий-нинг «Яхшилар дарёси» қасидасига жавоб тариқасида битилган қасидаси бор. Унда ажид мазмун ва нозик хаёлотга эга байтлар жуда кўп. Унинг бошланмаси бундай:

Подшоҳлар тожида ёлқинли лаъл бўлса беҳак,  
Бошдаги ҳар хом хаёлга тоб берувчи чўғ демак.

Куйидаги рубоий эса, бир кишининг Ҳижоздан қайтиб келиши муносабати ила ёэилган табрик мактубидан олинди:

Фалак инсоф била етказгил пайғом,  
Қани ким яхшироқ айлади хиром.  
Эрта тонгда Шарқдан чиққан қуёшми,  
Тўлин ойми чиққан жойи бўлса Шом.

Бу рубоий эса бошқа бир мактубдан:

Бу нома мактубмас, дардим дармони,  
Ҳижронда ээилган юрагим қони.  
Қайноқ дилу совуқ оҳим таскини,  
Яхши жаҳонгашта моҳим нишони.

Яна бир мактубдан рубоий:

Майхонада доим сендан сўзлайман,  
Ҳарамда ҳам тинмай сени излайман.  
Мардум ичра келсан дейман, юзма-юз.  
Фироқда ҳам дилдан секин кўзлайман.

## *Саккивинчи равва*

### **МАСАЛЛАР**

#### **Ҳикоят**

Кўрганмисан, табиб аччиқ дорини,  
Шакар билан ширин қилгани замон.  
Шундай ҳийлам билан бемор танидан  
Барча касалликни қувади осон.

#### **Ҳикоят**

Бир тулки бир бўрига ҳамсуҳбатлик дамин урди ва у тамом мувофақат йўлига юрди. Бир куни бир боққа бордилар, боғнинг эшиги маҳкам банд ва девори баланд эди.

Девор атрофида чопишди, охири, бир тешик топишди. У тулкига кенгу бўрига тор эди. Тулки осонликча кириб кетди-ю, бўри сиқилиб, қийналиб ўтди.

Хилма-хил узумлар, мевалар топишди; баридан тошишди, тулки тийракроқ бўлди, чиқиб кетиш андишасини қилди, аҳмоқ бўри бўлса, қорнига сиққунча еди. Бирдан боғбон билиб қолди, қўлига таёқ олди ва булар тараф йўл солди. Хипча бел тулки лип этиб тешикдан ўтди-кетди. Боғбон эса қорни шишиб, тешикка қисилиб қолган бўри бошига етди. Уни чунонам саваладики, бе-

чоранинг пўсти шилиниб, жуни юлиниб, тору танг тешикдан аранг чиқиб кетди.

Эй хожа, олтинга кўп ҳирс қўймагил,  
Охири яланғоч, ҳақир кетасан.  
Нозу-неъматдан кўп семираверма,  
Ўйлагил, гўрингда нечук ётасан.

### Ҳикоят

Нишида ўлим заҳри ва табиатида ёмонлик фахри бўлган бир чаён сафарга чиқди. Бир кенг дарё лабига етиб олди, аммо ўтолмай чорасиз қолди. На сузиб ўтиш гумони на қайтиб кетиш имкони бор. Буни кўриб турган тошбақа-нинг унга раҳми келиб, орқасига миндириди ва ўзини сувга урди. Ўзга қирғоқча сузиб кетди-ю, дарёнинг қоқ ўртасига етди. Қулоғига қандайдир овоз келди, чаён унинг орқасига бир нарса санчаёттанини билди.

— Бу ниманинг овози? — деб сўради чаёндан.  
— Бу сенинг орқангта санчаёттан нишим овози, — деди чаён, орқангта нишим асар қиласлигини биламан, аммо ўз одатимни тарк этолмасам нима ҳам қиласман.

Душманликдан эмас, чаён чақиши,  
Шундай эрур табиатин боқиши.

Тошбақа бўлса, «бу бадхулқни ўз хулқидан ва бошқа яхшиликларни бунинг қиласидан халос қилганим яхши экан», деб ўйлади ва сувга бир шўнғиди. Чаённи тўлқин шу заҳотиёқ юлиб кетди, ному нишонсиз қилиб кетди.

Ёмон золим киши ҳар кез сочар юз ҳийлаю найранг,  
Унинг хулқи билан фитна аламга тўлгуси олам.  
Ўлим гирдобига шўнгиб йўқолса ном-нишонасизу  
Ўзин ҳам қутқарар бадхулқлиғдан барча элни ҳам.

## Ҳикоят

Бир сичқон бир баққол дўқонида истиқомат қилар, ундаги қуруқ ва ҳўл мевалардан хоҳлаганича татиб юрар эди. Баққолнинг бундан хабари бўлса-да, бепарво қарар, унга ҳеч чора кўрмас эди. Аммо:

Олчоқ разил қорин тўйған чоқ,  
Олчоқлиги бўлур дадилроқ —

деганлариdek, сичқоннинг ҳам ҳирси ошиб, баққол ҳамёнини тешиб, тагига етди ва ундаги олтин-кумуш ҳарна бўлса барини инига ташиб кетди. Баққолга пул керак бўлиб, ҳамёнга қўл урди ва уни гадой тўрнасиdek бўш, очлар меъдасидек кўрди. Билдиким, бу ўша сичқоннинг иши. Баққол мушукдек пусиб ётди ва сичқон чиқиши биланоқ унга ўзини отди.

Ушлаб олиб, оёғига бир узун ип боғлади. Кўйиб юборган эди, сичқон инига олиб борадиган бир тешикка кириб кетди. Баққол ипни ўлчаб кўриб, сичқон инининг қанча узунлигини билиб олди. Тешикни ковлаб қараса, сичқон уяси саррофнинг дўқонидек олтин-кумушга, динор ва дирҳамларга лиқ тўла. Гулларни олди ва сичқонни ташқариға чиқариб, мушук оғзига солди. У қилганига яраша кўрди ва нонкўрлиги учун бўлганича бўлди.

Ҳирсу пастлик келтирар бошларга ташвиш доимо,  
Ким қаноат аҳлидур хуррам дилу хуррам ҳаёт.  
Билмагай бош оғриғин, роҳатдадир қонеъ киши,  
Кимни ҳирси бўлди ортиқ топмагай боши нажот.

## Ҳикоят

Бир тулки йўл бошида туриб, ўнг ва сўлига кўз ташлар эди. Ногоҳ узоқдан бир нарсанинг қораси кўринди. Яқинроқ келганда қараса, бир ваҳший бўри, каттакон бир ит билан содиқ дўст ва мувоғиқ ўртоқлардек биргаллашиб келишмоқда. На ит бўрининг хиёнаткорлигидан қўрқар ва на бўри итнинг тишларидан ҳайиқар эди.

Тулки улар истиқболига чиқиб, салом берди ва улар эҳтиромини бажо келтирди.

— Алҳамдуиллоҳ, — деди тулки, — қадимий адоват, янги садоқат билан алмашинибди, аммо бу иттифоқнинг сабаби нима эканлигини ва бу яраш сабабчиси кимлигини билсан бўладими?

— Иттифоқчилигимизнинг сабаби — чўпоннинг душманлиги, — деб жавоб қилди ит, — чўпон билан бўрининг адовати маълум, тушунтиришнинг ҳожати йўқ. Мен билан унинг адовати сабаби қуйндагича: кеча менга дўстлик давлати мұяссар бўлган мана шу бўри галага ҳужум қилиб, бир кўзичоқни олиб қочди. Мен одатим бўйича қўзини кутқариб қолиш учун бўрининг кетидан югурдим, аммо етолмадим. Қайтиб келганимда чўпон менга таёқ кўтарди ва сабабсиз менга озор берди. Мен ҳам у билан дўстлик алоқаларини уздим, унинг эски душмани билан иттифоқ туздим.

Душманга кўрсаттил дўстликни, ҳаргиз  
Адоват тифидан тилинмас пўстинг.  
Адоват кўрсатма дўстларга асло,  
Аламидан душман бўлмасин дўстинг.

## Ҳикоят

Бир тулкига:

- Қишлоқ итларига пайғомимизни олиб боргил, ҳақига юз динор пул олгил, — деганларида у:
  - Ҳақи анча мукофот, аммо ишнинг ўзи жонга оғат,
  - деб жавоб берибди.
- Нокаснинг дарёдек мавжини кутмак,  
Дарё гирдобида сузмак демакдир.  
Душманга бўйин эгмак, молу мансаб деб,  
Асли жондан умид узмак демакдир.

## Ҳикоят

Бир тия саҳрода ўтлаб юрар, ундаги қуруқ тиканаклардан тамадди қиласр әди. Бир янтоққа етишди, у гўзаллар зулфидек жингалак, жонон ёноғидек тоза ва беғубор әди. Ундан баҳра олай деб бўйини чўэди, унинг устида кулча бўлиб ётган илонни кўриб қолди.

У орқага чекинди ва орзусидан қайтди.  
Янтоқ бўлса, «туя менинг тиканагим найзалари заҳмидан қўрқди», деб ўйлади.  
Тия янтоқнинг дилидан ўтган гапга тушунди ва деди:  
— Менинг қўрқувим сабаби бу ошкор мезбон эмас, балки пинҳон меҳмон.

**Ҳафим эса тикан заҳми эмас, илон заҳри. Агар мәҳмон ҳафидан узоқ кетардим, мәзбонни икки ямлаб бир ютардим.**

Яхши агар қўрқса ёмон одамдан,  
Жон эмас обрўсин ўйлар ул замон.  
Кул устига оёқ қўймаган одам  
Билурки остида оташи пинҳон.

### **Ҳикоят**

Бирор луқма овқат тополмаган оч ит шаҳар дарвозаси ёнида тураг эди. Кўрдики, бир нон дарвозадан юмалаб чиқиб, саҳро томон фиддираб кета бошлади. Ит ҳам унинг кетидан югурга кетди ва деди:

— Эй тан қуввати ва руҳ қудрати, эй дил мароми-ю, жон ороми, не сафар ихтиёрин кўнгилга солдинг ва қай тараф йўл олдинг?

— Бу саҳрова бир неча шуҳратли бўри ва йўлбарслардан ошноларим бор, шулар зиёратига бел боғладим.

— Мени қўрқитма, — деди ит, — агар тимсоҳ бўғэига ёки шер оғзиға кирсанг ҳам мен сендан қолмайман.

Сендан ўзга ҳеч йўқдир ниятим,  
Умримда сендан асло қолмайман.  
У дунёга йўл олганингда ҳам,  
Сендан бир қарич ажralолмайман.

### **Ҳикоят**

**Қисқичбақадан сўрадилар:**

— Нечун бунчалик қийшайиб кетдинг, ҳаммаёғинг қийшик, оёқ-қўлинг ҳам, юрган йўлинг ҳам.

— Илондан ибраг олдим, — деди у, — шундай тўғрилиги ва тик йўлдан юришига қарамай доим боши жафо тошидан эзилган ва думи ситам заҳмидан узилган.

Қайда пари сурат бўларкан пайдо,  
Уни тор оғушига тортар ҳар киши.  
Қайда тўғриликким, эзоҳир бўларкан,  
Илондек бошини янчмоқдир иши.

### Ҳикоят

Мусичадан сўрадилар:

— Нечун фақат иккитадан бола очсан, товуқлар каби кўплаб очишга қувватинг келмайдими?

— Мусича болалари ота-онасининг жигилдонидан овқат ейди, — жавоб берди у, — товуқ болалари эса кўринган ахлатни титиб, қорин тўйғазади. Бир жигил-дондан икки боладан ортиқни тўйғазиб бўлмайди, бир ахлатхонадан минг жўжа тамадди қила олади.

Истар эсанг агар ҳалол нон,  
Йигаверма тор уйда кўп жон.

### Ҳикоят

Курбақа ўз жуфтидан айрилиб қолди, ёлғизликдан сикилиб, дарё қирғоғига йўл олди. Ҳар томон назар солди...

Сув ўртасида кўрди бир балиқ  
Тоза сувдек оқар, усти ясоғлик.  
Ё бир қайчидек тоза кўмиши,

Сув атласини кесмоқлик иши.  
Ё уч кунлик ой равшан ҳилоли,  
Ҳар томон сузар яшнаб жамоли.

Бақа уни кўриши биланоқ кўнгли кетди ва ўзининг тўқдигидан гапириб, уни ҳамдамликка чорлади.

— Ҳамсуҳбат бўлмоқ учун орада умумий муносабат бўлиши керак, — деди балиқ, — номуносиб ҳамдамлар суҳбатта нолойиқ. Менга сенинг не муносабатинг бор ва сен билан бизни орамизда қандай суҳбат даркор. Мен дарё қаърида яшайман, сен эса соҳилда, менинг даҳаним доим жим, сенинг эса жағинг тинмайди, сенинг ташқи кўринишинг балоларга қалқон, шакл-шамойилингни ким кўрса сендан йироқ қочади, менинг ҳусним эса хавфи хатар асоси, кимки менинг жамолимни кўрса, таъма кўзини очади, осмондаги қушлар ҳавоси ҳам мен, ердаги жони-врлар бошида савдоси ҳам мен. Балиқ овловчилар гоҳ мени қидириб минг кўзли тўр ташлайдилар, гоҳ орзуйим юқидан ҳам бўлган қоматларидек қармоқларни ташлаб кўзим ёшлийдилар.

Балиқ сўзини тугатиб, бақани соҳилда ёлғиз қолдириб, ўзи сув қаърига шўнғиб кетди.

Бўлма ҳамсуҳбат, сенга бир бўлмас эрса гавҳари,  
Гавҳари бир бўлмаса суҳбат ёпишмас сар-сари.  
Жинс тортар жинсига, нокас қўшилганда кўринг,  
Мисли ёгу сув бўлур, бўлмайди сутта шаккари.

### Ҳикоят

Чумчук ўз мерос инини ташлаб, лайлак уясининг бир чеккасига кириб олди. Унга:

— Сенинг лайлак билан нима муносабатинг борки, кичик тананг билан бундай катта қушга ҳамсоялик даъвосини қиласан ва бир уйда туришга интиласан? — дедилар.

— Мен ҳам буни тушунаман, — деди чумчуқ, — аммо билганимга риоя қилолмайман. Чунки менинг қўшним бир илон. Мен ҳар йили бола очаман, жигар қоним билан уларни парвариш қила бошлайман. Аммо илон бирдан ҳужум қилади ва болаларимни ютиб ҳазм қилади.

Бу йил унинг ғазабидан узоқ чопдим ва бу улуғ қуш ҳузуррида паноҳ топдим. Умидим шуки, у додимга етар, ҳар йили болаларим унга емиш бўлар эди, энди ўзи бунга емиш бўлса, дейман.

Агар тулки бўлса шер тўқайида —  
Бўри чанталидан топади омон.  
Кичиклар зулмидан қутулмоқ учун  
Катта ҳузурига интилар инсон.

## Ҳикоят

Итдан сўрадилар:

— Нима учун сен бор уйга гадо қадами етмайди, сен ётган оstonани тиламчи хатлаб ўтмайди?

— Мен ҳирс ва таъмадан узоқман, — деди ит. — Таъмасизлик ва қаноатда машхурман. Дастурхондан бир бурда нонга қаноат қиласан, қозондан бир ғажилган устухонга хурсанд бўламан. Аммо тиланчи ҳирс ва таъмада шуҳрат қозонган. У ҳамма вақт очман деб қўл чўзади. Ҳалтасида бир ҳафталик нон-у, ўзи очман деб нолон. Орқасида бир ҳафталик овқат, қўлида гадо ҳассаси. Қаноат ҳамма вақт ҳирсу таъмадан узоқ, қаноатли ҳам тамагир билан бўлолмас ўртоқ.

Кимнинг қалб дилига кирди қаноат,  
Ҳирс билан таъмадан қутулди бори.  
Қаноат гилами тўшалган ерда,  
Синди очкўэлигу таъма бозори.

### Ҳикоят

- Бир тулки боласи онасиға қараб:
- Менга ит билан юзма-юз келиб қолганда қутулиб кетиши ҳийласини ўргат, — деган экан, унга онаси:
  - Бунинг ҳийласи жуда кўп, аммо энг яхшиси шуки, уйдан чиқмай ўтири, на у сени кўрсин ва на сен уни, — деб жавоб бериди.

Нокас сенга душман бўлиб қолса гар,  
Минг хил ҳийла-найранг айлама пардоз.  
Минг хил ҳийла-найранг заҳмидан кўра  
Сулҳи-ю, жангидан сақланганинг соз.

### Ҳикоят

- Қовоқари асаларига ҳужум қилиб, уни тутиб олди ва емак учун чанг солди.
- Дод, — деди асалари, — ҳаммаёқда шаҳду шакар, инларимда тўла асал, шулар туриб нечун мени ейсан?
  - Чунки шаҳду шакар кони ҳам сен, асалу нектар хирмони ҳам сен — деди ари.

Хушбахтдир ҳақиқат излаган киши,  
Саломга қониқмай суҳбатта шошар.  
Парда орқасидан асал кўринмас,  
Суҳбатда очилар асли не гавҳар.

## **ХОТИМА**

Дилимдан ўтмиш ва хотирамга етмиш эдиким, бу нома бунчалик тез охирига инмас ва бу хома мақсад йўлида югуришдан бунчалик барвақт тинмас. Аммо муаллифнинг таъб оиласига маломат занги тушди, ўқувчининг марҳамат ва рағбат кўли унга жило бермагач, китобга қисқалик етушди.

Қисқа қыл Жомий, сўз бисотини,  
Йўқдир қисқаликдан яхшироқ бисот.  
Агар сўзларингдан шодлик етмаса,  
Бурчакда дамингни олиб, жимжит ёт.  
Ўз таъбинг севинса етарли эмас,  
Агар ўқиганлар севинмаса бот.

Бундағ наср ва наэмдан ҳар нимаики келтирилган бўлса ва муаллиф исми кўрсатилмаган бўлса, бу китоб муаллифи завқининг шеваси ва китоб муаллифи хаёлининг мевасидир.

Жомий ҳар доимо китоб ёзаркан  
Ўзгадан омонат олмади мутлоқ.  
Ўз санъат дўкони тўла кишига  
Ярашмас бошқалар даллоли бўлмоқ.

Мутолаа қилувчиларнинг олижаноблигидан қўрган нуқ-сонларини карам этиб, кўэ юмиб ўтарлар, уни ифшо этмоқ учун оғиз очиб, тил чиқармаслар деган умидим бор.

Ошнолар айбини кўриб қолсанг гар,  
Яхшимасдир уни ўзгага айтмоқ.  
Оқибатин ўйлаб иш қилувчи дер,  
Айб очмоқдан яхши айбни беркитмоқ.

Китобнинг ёэилиш тарихи қуийдагича:

Бу турфа номада қалам ишидан,  
Жомий ўз завқини синади осон.  
Тарихин билмоқчи бўлсанг саккиз қўш,  
Тўққиз юз бўлади шунда бенуқсон.

## ИЗОҲЛАР<sup>3</sup>

**Абдулло Жаъфар ўғли** — Алининг жияни. Мадинада яшаб, 699 йили вафот этган. Ривоятларда сакийлиги билан машҳур.

**АбдуллоҳAnsorij** — тасаввуфнинг йирик шайхи, назариётчиси ва амалиётчиси, машҳур шоир (1006-1088). Кўпроқ Ҳиротда яшагани учун Ҳирот пири лақабини олган.

**Абдул Малик бинни Марвон** — Уммавий халифаларидан бири (685-705 йиллар) Ҳажжож унинг Ироқдаги ҳокими бўлган.

**Абуали Рудборий** — тўлиқ исми Аҳмад ибни Муҳаммад. 933 йили вафот этган, тасаввуф шайхларидан.

**Абу Бакр Сиддиқ** (Абдулло ибни Абу Қуҳофа) — Муҳаммад пайғамбар (с.а.в.) сафдошларидан бири, унинг қайнатаси ва ундан сўнг биринчи халифа (571-634) Сиддиқ (дўст) лақабига эга бўлган.

**Абу Санд ибни Абул Хайр** — Хуросон сўфийларининг йирик шайхларидан бири, 957-1049 йилларда яшаган.

**Абу Ҳошим Сўфий** — биринчи сўфий шайхларидан, Куфа шаҳрида туғилган, Сурияда яшаб, 777 йилларда вафот этган.

**Адиб Собир Термизий** — машҳур шоир, дипломатик ишда ишлаган, 1151 йилда Амударёга чўқтирилган. Туғилган йили 1065-1070 йиллар орасида.

**Адл** — адолат, тўғрилик.

---

<sup>3</sup> Изоҳларни Алишер Шомуҳамедов тузган.

**Ажам** — ноараб, араблар ўзларидан бошқаларни шундай атаганлар, бу сўз Эронга нисбатан ҳам ишлатилган.

**Айнул Қувозот** — шоир ва тасаввуфчи олим Абул Фазойил Абдулло Миянжининг лақаби. У Ҳамадонда яшаб фикҳ (қонуншунослик)дан дарс берган. «Эубдатул Ҳақойиқ» (Ҳақиқат қаймоги) номли китоби бўлган. 1139 йил кофирликда айбланиб, қатл этилган.

**Али ибни Абу Толиб** — Муҳаммад пайғамбар (с.а.в.) нинг амакиваччаси ва күёви, ундан кейинги тўртинчи халифа (656-661). Шиаларнинг биринчي имоми.

**Ал-уҷада-ала-ар-ровий** — арабча ибора «рост ёғонлиги ривоятчилар бўйнига» маъносида.

**Амир Муиззий** — Салжуқийлар даврида яшаган йирик шоир, Санжар (1117-1153) даврида у шоирлар амири унвонини олган. Ўлган йили аниқ эмас, манбаларда 1126-1147 йиллар келтирилади.

**Анбар** — хушбўй нарсалар аралашмасидан тайёрланган модда.

**Анварий** — Авҳодиддин Муҳаммад Анварий XII асрнинг улкан шоирларидан. Қасидачиликда ҳаммадан ўзиб кетган. Аммо умрининг охирида бу шеър турини ва умуман сарой шоирлигини қоралайди. Вафоти 1169 йил.

**Арестотель (Аристоталис)** — асримиёдан олдин 322-384 йилларда яшаган юонон файласуфи.

**Аркони давлат** — давлат устунлари — давлат арбоблари.

**Аробий** — саҳрои араб.

**Асжадий** — Маҳмуд Газнавийнинг сарой шоирларидан бири. Вафоти 1041 йил. Қасида устодларидан бўлган.

**Асҳоб** — ҳамсуҳбат дўстлар.

**Атама** — термин.

**Ато** — аталган нарса, совфа.

**Афзалиддин Ҳоқоний** — форсий тилда ёзган. Озарбайжон мумтоз шоири. Асарлари ўзига хос услугга эга бўлган новатор шоир, 1121-1199 йилларда яшаган.

**Ашъор** — шеърнинг кўплиги, шеърлар.

**Бадавий** — саҳрои араб.

**Баҳул** — ҳозиржавоблиги билан ном чиқарган қаландар.

**809** йилда вафот этган.

**Баҳоуддин Нақшбандий** (Сайд Муҳаммад ибни Жалолиддин) Марказий Осиё, Эрон, Афғонистонда кенг тарқалган нақшбандия сулукининг асосчиси, юрик тасаввуп шайхи, 1318-1388 йилларда яшаган.

**Баҳр-ку!** — Бунда сўз ўйини ор. Шеър баҳри ва денгиз маънолари бор.

**Бийрон** — қоврилган, қаттиқ қоврилган.

**Бузургмеҳр** — Шоҳ Ҳусрав-I Анушировоннинг афсонавий вазири. Донишманд олим образида кенг тарқалган.

**Вазн** — ўлчов, шеър ўлчови.

**Вис ва Ромни** — XI аср шоири Фахриддин Журжонийнинг романтик поэмаси.

**Вомиқ ва Узро** — Унсурийнинг романтик достонларидан бири. Достондан айрим парчаларгина бизгача етиб келган.

**Гив** — форс-тожик эпосида Эрон қаҳрамонларидан бири. Пашан (қаранг) бошлиқ туронийлар билан жанг қилган.

**Гуй ва ҷағгон** — от миниб ўйналадиган копток ўйини, ҳозирги чим хоккейга ўхшаш.

**Дарвеш** — фақир, камбагал, сўфий.

**Дақиқий** — Абу Али Муҳаммад Дақиқий Балхий X аср юрик шоирларидан. Ундан бир неча ажойиб шеърлар ва «Шоҳнома»сидан минг байт сақланиб қолган. «Шоҳнома» ёзаётган даврда ўлдирилган (977 й).

**Динор** — олтин танга.

**Дирҳам** — кумуш танга.

**Жавишан** — совут, зириқ.

**Жалолат** — улуғлик, буюклик.

**Жамоа** — сўфийлар жамоати, тасаввупчилар йигини.

**Жамоа мачити** — жума ва ҳайит кунлари номоз ўқила-диган, катта мачит.